

ओं नमः परमात्मने, श्री महागणपतये नमः

श्री गुरुभ्यो नमः

हरिः ओं

उदकशान्ति मन्त्र पाठः

(AnuShangam with Continuous Text)

Contents

1 उदक शान्ति	6
1.1 वेदारंभे सर्वसाधारण्येन जप्याः मन्त्राः.....	6
1.2 वेदाधया	6
1.3 रक्षोघ्नं	7
1.4 इन्द्र सूक्तं	9
1.5 ये देवाः.....	12
1.6 ये देवाः (अनुषङ्गं).....	13
1.7 आयुष्कामेष्टि मन्त्राः.....	14
1.8 आयुष्कामेष्टि मन्त्राः (अनुषङ्गं)	14
1.9 अगंहोमुच मन्त्राः.....	15
1.10 अगंहोमुच मन्त्राः (अनुषङ्गं).....	15
1.11 शास्तृ सूक्तं (आप्यं)	16
1.12 राष्ट्रभृतं.....	17
1.13 राष्ट्रभृतं (अनुषङ्गं).....	18
1.14 सर्प सूक्तं	20
1.15 पञ्चचोडाः.....	21
1.16 पञ्चचोडाः (अनुषङ्गं)	22
1.17 अप्रतिरथः	23
1.18 चमकं तृतीय अनुवाकः.....	25
1.19 विहव्यम्.....	25

1.20 मृगारः.....	27
1.21 सर्पाहुती मन्त्राः	30
1.22 सर्पाहुती मन्त्राः (अनुषङ्गं).....	30
1.23 गन्धर्वाहुतीः	32
1.24 गन्धर्वाहुतीः (अनुषङ्गं).....	32
1.25 अज्यानि मन्त्राः.....	34
1.26 अथर्वशीर्ष	35
1.27 प्रत्यङ्गिरसः.....	36
1.28 अन्न सूक्तं.....	40
1.29 वाख् सूक्तं	41
1.30 श्रद्धा सूक्तं	43
1.31 ब्रह्म सूक्तं	43
1.32 गो सूक्तं.....	44
1.33 सूर्या चन्द्रमसा सूक्तं.....	46
1.34 नासदासीय सूक्तं.....	48
1.35 भाग्य सूक्तं.....	49
1.36 नक्षत्र सूक्तं(वाक्यं).....	51
1.37 नक्षत्र उपहोम मन्त्राः.....	66
1.38 वरुण सूक्तं	74
1.39 पवमान सूक्तं.....	75
1.40 नक्षत्र सूक्तं (नक्षत्र जप मन्त्राः).....	78

Notes: This Book has been brought to you with the courtesy of some Veda learners who have collaborated to prepare this book.

Please give your feedback, comments and report errors to the e-mail id **vedavms@gmail.com**. We shall strive to make this book more accurate and error-free.

You may note that there are inherent “paata bedhas” when we compare various sources and books. We have made constant reference to the Taittiriya Sakhaa compiled and commented by Shri. Sayanacharya of 13th Century and Shri Bhatta Bhaskaracharya (period unknown). Their manuscript compilations were later converted into books by great Scholars. One of such sets of “Taittiriya” was printed and published during earlier 1900 A.D. at Govt. Branch Press, Mysore and another set later published under “Anandaashram Series”. These Books were referred to by us as our primary source material for this Book.

This book has not been prepared with any commercial purpose and is purely for studies.

Conventions used in Letters:

◡ – is represented by (g)

◡
— is represented by (gg)

◡
— is represented by (gm)

◡
— is represented as anunaasikam

(hyphen) – used between words indicate that the words has parts which need to be rendered together as per your Guru’s teachings. This sign is used in areas to split words which are long or the words has been constructed through Sandhis which result in “different letters” (which joins the original padam of words) and also for ease of reading/rendering.

The usages of hyphens slightly vary in Sanskrit, Malayalam and Tamil books based on the usages in theses languages.

Version Notes: Version 4.0 dated 30th November 2019

1. In this Version, the Source references of various Mantras have been indicated.

TS - Taittiriya Samhita
TB - Taittiriya Brahamanam
TA - Taittiriya Aranyakam
EAK - Ekaagni Kaandam
RV - Rig Veda Samhita

2. Corrections found and reported till 30th November 2019 have been incorporated
3. Convention improvements in Nasal, representation of Svarabhakti and sound extensions have been incorporated
4. Some Paragraph numbering has been changed to match with Mantra Source Reference.
5. This is special version, **with and without anushangam but the anushanam texts for continuous rendering with Sandhis** , has prepared at the request of some Veda Learning Groups.
6. This Version is **released as 4.0 directly** to make other earlier versions comparable.

1 उदक शान्ति

1.1 वेदारंभे सर्वसाधारण्येन जप्याः मन्त्राः

ओं भूः तत्स॑वितु॒र्-वरै॑ण्यं । ओं भुवः॑ भर्गो॑ दे॒वस्य॑ धीमहि ।
 ओ॒म् सुवः॑ धियो॑ यो॒नः प्रचो॑दयात् ।

ओं भूः तत्स॑वितु॒र्-वरै॑ण्यं । भर्गो॑ दे॒वस्य॑ धीमहि ।
 ओं भुवः॑ धियो॑ यो॒नः प्रचो॑दयात् ।

ओ॒म् सुवः॑ तत्स॑वितु॒र्-वरै॑ण्यं भर्गो॑ दे॒वस्य॑ धीमहि ।
 धियो॑ यो॒नः प्रचो॑दयात् ।

ओं शान्तिः॑ शान्तिः॑ शान्तिः॑ ।

1.2 वेदाधया

अ॒ग्निमी॑ळे पु॒रोहि॑तं-य॒ज्ञस्य॑ दे॒वमृ॑त्विजं । हो॒तारं॑ रत्न॑ धा॒तमं॑ ।

इ॒षे त्वो॑र्जे॒त्वा वा॑यव॒स्थो पा॑यव॒स्थ दे॒वो व॑सवि॒ता प्रा॑र्पयतु॒ श्रेष्ठ॑तमा॒य
 क॒र्मण॑ आ॒प्याय॑द्ध्वम॒घ्निया॑ दे॒वभा॑ग मूर्ज॑स्वतीः पय॑स्वतीः

प्र॒जाव॑तीरनमी॒वा अ॑यक्ष्मा मा व स्तेन॑ ई॒शत॑ माऽघ॑श॒सो रु॒द्रस्य॑

हे॒तिः॑ परि॑ वो वृ॒णक्तु॑ ध्रु॒वा अ॒स्मिन् गो॑प॒तौ स्या॑त ब॒ह्वीर् यज॑मानस्य
प॒शून् पा॑हि ॥

अ॒ग्न आ॑याहि वी॒तये॑ गृ॒णानो॑ ह॒व्यदा॑तये । नि॒होता॑ स॒थ्सि ब॒र्हिषि॑ ।

श॒न्नो दे॒वीर॒भिष्ट॑य आपो॑ भवन्तु पी॒तये॑ ॥ शं यो॒रभि॑स्रवन्तु नः ॥ १ (१)

1.3 रक्षोघ्नं

TS 1.2.14.1 to TS 1.2.14.7 for Para 1 to 8

कृ॒णुष्व॑ पा॒जः प्र॑सि॒तिन्न॑ पृ॒थ्वीं या॑हि रा॒जे वा॑म॒वाꣳ इ॒भेन॑ ।
वृ॒ष्वी म॒नु प्र॑सि॒तिं द्रू॑णानोऽस्ताऽसि॑ वि॒ध्य र॒क्ष स॑स्त॒पिष्ठैः॑ ।
तव॑ भ्र॒मास॑ आ॒शुया॑ प॒तं त्य॑नुस्पृ॒श-धृ॑ष॒ता शो॑शु॒चानः॑ ।
तपूꣳष्य॑ग्ने जु॒ह्वा प॑तं-गा॒नस॑न्दि॒तो वि॑सृ॒ज वि॑ष्व गु॒ल्काः ।
प्र॒तिस्प॑शो वि॒सृज॑-तू॒र्णित॑मो भ॒वा पा॑युर्वि॒शो अ॒स्या अ॑द॒ब्धः ॥ २

यो॒नो दू॒रे अ॒घशꣳसो॑यो अ॒न्त्य॑ग्ने मा॒किष्ठे॑ व्य॒थिरा॑ द॒धर्षी॑त् ।
उ॒दग्ने॑ तिष्ठ॒ प्रत्या॑ तनुष्व॒न्यमि॑त्राꣳ ओष॒ता-ति॑ग्महे॒ते ।
यो नो॑ अ॒रातिꣳ स॑मि॒धान॑ च॒क्रे नी॒चा तं॑धक्ष्य॒त सन्न॑ शु॒ष्कं ॥
ऊ॒र्ध्वो भव॑ प्र॒ति वि॒ध्या-ध्य॑स्मदा वि॒ष्कृ॑णुष्व॒ दैव्या॑न्यग्ने ।

अव॑स्थि॒रा त॒नुहि॑ या॒तु जू॒नां जा॒मिम॒जामिं॑ प्र॒मृणी॑हि श॒त्रून् ॥ 3
 स॒ते जा॒नाति॑ सु॒मतिं॑ यं वि॒ष्टय॑ ई॒वते॑ ब्र॒ह्मणे॑ गा॒तुमै॑रत् ।
 वि॒श्वा॒न्यस्मै॑ सु॒दिना॑नि रा॒यो द्यु॒म्ना॒न्यर्यो॑ वि॒दुरो॑ अ॒भिद्यौ॑त् ।
 से॒दग्ने॑ अस्तु सु॒भग॑ स्सु॒दानु॑र् यस्त्वा नि॒त्येन॑ ह॒विषा॑ य उ॒क्थैः॑ ।
 पि॒प्री॑षति स्व आयु॒षि दुरो॑णे वि॒श्वेद॑स्मै सु॒दिना॑-सा॒ऽसदि॑ष्टिः ।
 अ॒र्चा॒मि॒ते सु॒मतिं॑ घो॒ष्यर्वा॑ख्-सन्ते॑ वा वा॒ता ज॒रता॑ मि॒यंगीः॑ ॥ 4

स्व॒श्वा॒स्त्वा सु॒रथा॑ म॒र्जये॑-मा॒स्मे क्ष॒त्राणि॑ धा॒रये॑र-नु॒द्यून् ।
 इ॒ह त्वा॑ भू॒र्या च॑रेदु॒प॒त्मन् दो॑षाव॒स्तर॑ दी॒दिवा॑ꣳ स॒मनु॑द्यून् ।
 क्री॒डन्त॑स्त्वा सु॒मन॑स स्स॒पेमा॑भि द्यु॒म्ना त॑स्थि॒वाꣳसो॑ ज॒नानां॑ ।
 यस्त्वा स्व॒श्वस्सु॑हि॒रण्यो॑ अ॒ग्न उप॑याति व॒सुम॑ता र॒थेन॑ ।
 तस्य॑ त्रा॒ता भ॑व॒सि तस्य॑ स॒खा यस्त॑ आ॒तिथ्य॑ मा॒नुष॑ग् जु॒जोष॑त् ॥ 5

म॒हो॒रुजा॑मि ब॒न्धुता॑ व॒चो भि॑स्त॒न्मा पि॒तुर्गो॑त॒माद॑ न्वि॒याय॑ ।
 त्व॒न्नो अ॒स्य व॑च॒स-श्चि॑कि॒द्धि हो॑तर्यवि॒ष्ट सु॒क्रतो॑ द॒मूनाः॑ ।
 अ॒स्वप्न॑ ज॒स्तर॑णय स्सु॒शेवा॑ अ॒तन्द्रा॑सोऽवृ॒का अ॑श्र॒मिष्ठाः॑ ।
 ते पा॒यवः॑ स॒ध्रिय॑ञ्चो नि॒षद्या॑ग्ने तव॑ नः पा॒न्त्वमू॑र ।
 ये पा॒यवो॑ मा॒मते॑यं ते अ॒ग्ने प॑श्यन्तो अ॒न्धं दुरि॑ताद॒ रक्ष॑न् ।
 र॒रक्ष॑ ता॒न्त् सु॒क्रतो॑ वि॒श्ववे॑दा दि॒प्सन्त॑ इ॒द्रिप॑वो ना॒ह दे॑भुः ॥ 6

त्वया॑ वय॑ꣳ स॒धन्य॑-स्त्वो॒ता स्तव॑ प्र॒णीत्य॑ श्याम॒ वाजान्॑ ।
 उ॒भाश॑ꣳ सा॒ सूदय॑ सत्यता तेऽनु॒ष्टुया॑ कृ॒णुह्य॑-ह्याण ।
 अ॒या ते॑ अ॒ग्ने स॒मिधा॑ वि॒धेम॒ प्रति॒स्तोम॑ꣳ श॒स्यमा॑नं गृ॒भाय॑ ।
 द॒हाश॑सो र॒क्षसः॑ पा॒ह्यस्मान्॑ द्रु॒हो नि॒दो मि॒त्रम॑हो अ॒वद्यात्॑ ।
 र॒क्षो॒हणं॑ वा॒जिन॑मा॒जि घ॒र्मि मि॒त्रं प्र॒थिष्ठ॑ मु॒पया॑मि श॒र्म ।
 शि॒शानो॑ अ॒ग्निः क्र॑तुभि॒ स्समि॑द्ध-स्स॒नो दि॒वा स रि॒षः पा॑तु न॒क्तं ॥ 7

वि॒ज्योति॑षा बृ॒हता॑ भा॒त्यग्नि॑ रा॒विर्-वि॒श्वानि॑ कृ॒णुते॑ म॒हित्वा॑ ।
 प्रा॒दे॒वीर्मा॒या स्स॑हते दु॒रेवा॑ शि॒शी॑ते शृ॒गे र॒क्षसे॑ वि॒निक्षे॑ ।
 उ॒तस्वा॒नासो॑ दि॒विष॑न्त्व॒ग्ने स्ति॒ग्मायु॑धा र॒क्षसे॑ ह॒न्त वा॑ उ ॥ 8 (2)

1.4 इन्द्र सूक्तं

TS 1.6.12.1 to TS 1.6.12.6, for para 9 to 14

इन्द्रं॑ वो॒ विश्व॑तस्परि ह॒वामहे॑ जने॒भ्यः । अ॒स्माक॑मस्तु के॒वलः॑ ।
 इन्द्रं॑ नरो॒ नेम॑धिता ह॒वन्ते॑ यत्पार्या॒ युन॑जते धि॒यस्ताः॑ ।
 शूरो॑ नृषा॒ता श॒वस॑श्च॒का न आ॑ गोम॒ति व्र॑जे भ॒जा त्व॑न्नः ।
 इन्द्रि॑याणि श॒तक्र॑तो या ते जने॒षु प॑ञ्चसु । इन्द्र॑ तानि॒ त आ॑ वृ॒णे ।
 अनु॑ते दा॒यि मह॑ इन्द्रि॒याय॑ स॒न्नाते॑ विश्व॒मनु॑ वृ॒त्रह॑त्यै ॥ 9

अनु॑ क्ष॒त्रम॒नु स॒हो॑ य॒ज॒त्रेन्द्र॑ दे॒वेभि॑रनु ते नृ॒ष॒ह्ये॑ ।
 आय॑स्मिन्त् स॒प्तवा॑स॒वा स्ति॑ष्ठन्ति स्वारु॒हो य॑था ।
 ऋ॒षिर्ह॑ दी॒र्घ श्रु॑त्त॒म इन्द्र॑स्य घ॒र्मो अ॑ति॒थिः॑ ।
 आ॒मासु॑ प॒क्वमै॑रय आ सूर्य॑ꣳ रो॒हयो॑ दि॒वि ।
 घ॒र्म॒न्न सा॑म॒न्त॒प॒ता सु॑वृ॒क्तिभि॑र्-जु॒ष्टं गि॑र्व॒ण से॑गि॒रः॑ ।
 इन्द्र॑मि॒द् गा॒थिनो॑ बृ॒हदिन्द्र॑ म॒र्केभि॑ र॒र्किणः॑ । इन्द्रं॑ वा॒णीर॑नूष॒त ॥ 10

गा॒य॒न्ति॒त्वा गा॒य॒त्रि॒णोर्चं॑ त्य॒र्क म॑र्कि॒णः॑ ।
 ब्र॒ह्माण॑स्त्वा श॒त॒क्र॒त-वु॒द्धꣳ श॑मि॒व ये॑ मि॒रे ।
 अꣳहो॑मु॒चे प्र॑भ॒रेमा॑ म॒नीषा॑ मो॒षिष्ठ॑-दा॒व्ने सु॑म॒तिं गृ॑णा॒नाः॑ ।
 इ॒दमिन्द्र॑ प्र॒ति ह॒व्यं गृ॑भा॒य स॒त्यास्स॑न्तु य॒ज॒मा॒नस्य॑ का॒माः॑ ।
 वि॒वेष॑य॒न्मा धि॑ष॒णा ज॑जा॒न स्त॒वै पु॒रा पा॑र्यादिन्द्र॒ महः॑ ।
 अꣳह॑सो य॒त्र पी॒प॒र॒द्य॒था नो॑ ना॒वेव॑ या॒न्त मु॑भ॒ये ह॒व॒न्ते ॥ 11

प्र॒स॒म्राजं॑ प्र॒थ॒म म॑ध्व-रा॒णामꣳ हो॑ मु॒चं वृ॑ष॒भं य॑ज्ञि॒यानां॑ ।
 अ॒पा॒न्न-पा॑त॒मश्चि॒ना ह॑य॒न्त म॑स्मि॒न्नर॑ इन्द्रि॒यं ध॑त्त॒मो॒जः॑ ।
 वि॒न इन्द्र॑ मृ॒धो ज॑हि नी॒ चा य॑च्छ॒ पृ॒त॒न्य॒तः॑ ।
 अ॒ध॒स्प॒दं त॒मीं कृ॑धि यो अ॒स्माꣳ अ॑भि॒दा॒स॒ति ।

इन्द्रक्षत्रमभि वाममोजो ऽजायथा वृषभ चरषणीनां ।
 अपानुदो जनममित्र यन्त मुरुं देवेभ्यो अकृणोरु लोकं ।
 मृगो न भीमः कुचरो गिरिष्ठाः परावत आजगामा-परस्याः ॥ 12

सृक् सृ शाय पविमिन्द्र तिग्मं विशत्रून् ताडि विमृधो नुदस्व ।
 विशत्रून् विमृधोनुद विवृत्रस्य हनू रुज ।
 विमन्युमिन्द्र भामितो ऽमित्रस्याभि दासतः ।
 त्रातारमिन्द्र मवितार मिन्द्र हवे हवे सुहव शूरमिन्द्रं ।
 हुवे नु शक्रं पुरुहूत मिन्द्र स्वस्ति नो मघवा धात्विन्द्रः ॥ 13

मा ते अस्या सहसावन् परिष्ठा वधाय भूम हरिवः परादै ।
 त्रायस्वनो ऽवृकेभिर्-वरूथै स्तव प्रियास स्सूरिषु स्याम ।
 अनवस्ते रथमश्वाय तक्षन्-त्वष्टा वज्रं पुरुहूत द्युमन्तं ।
 ब्रह्माण इन्द्रं महयन्तो अर्कैरवर्द्धय-न्नहये हन्त वा उ ।
 वृष्णे यत्ते वृषणो अर्कमर्चा निन्द्र ग्रावाणो अदिति-स्सजोषाः ।
 अनश्वासो ये पवयोऽरथा इन्द्रेषिता अभ्यवर्त्त तदस्यून् ॥ 14 (3)

T.A.6.1.9 for para 15a, TS1.4.41.1 & TS1.4.42.1 for para 15b

य॒त इन्द्र॑ भ॒याम॒हे ततो॑ नो॒ अभयं॑ कृ॒धि ।
 म॒घवन्॑ च्छ॒ग्धि तव॑ तन्न॒ ऊ॒तये॑ वि॒द्विषो॑ वि॒मृधो॑ ज॒हि ।
 स्व॒स्तिदा॑ वि॒शस्प॑ति-वृ॒त्रहा॑ वि॒मृधो॑ व॒शी ।
 वृ॒षेन्द्रः॑ पु॒र ए॒तु न॑ स्स्व॒स्तिदा॑ अ॒भयं॑ क॒रः । 15A

म॒हा॒ इन्द्रो॑ व॒ज्र बा॒हु षोड॑शी श॒र्म य॒च्छतु॑ ।
 स्व॒स्ति नो॑ म॒घवा॑ करो॒तु ह॒न्तु पा॒प्मानं॑ योऽ॒स्मान् द्वेष्टि॑ ।
 स॒जोषा॑ इन्द्र॒ सग॑णो म॒रुद्भि॒ स्सोमं॑ पि॒ब वृ॒त्रहन्॑ च्छू॒र वि॒द्वान् ।
 ज॒हि श॒त्रूँ र॒पमृ॑धो-नु॒दस्वा॑था भ॒यं कृ॑णुहि वि॒श्वतो॑ नः ॥ 15B (4)

1.5 ये देवाः

TS 1.8.7.1 for para 16

ये दे॒वाः पु॒रस्स॑दोऽग्नि॑ ने॒त्रा,
 दक्षि॑णस॒दो य॒मने॑त्रा,
 पश्चा॑त्स॒द स्स॑वि॒तृ ने॑त्रा,
 उत्त॑रस॒दो व॑रु॒णने॑त्रा,
 उप॑रिष॒दो बृ॑ह॒स्पति॑ ने॒त्रा,
 रक्षो॑ह॒णस्ते॑ नः पा॒न्तु ते॑ नोऽव॒न्तु ते॒भ्यो न॑म॒स्तेभ्य॑ स्स्वाहा
 -ऽग्नये॑ रक्षो॒घ्ने स्वा॑हा,

य॒माय॑ स॒वि॒त्रे ,
 व॒रु॒णाय॑ बृ॒ह॒स्प॒तये॑
 दु॒व॒स्व॒ते र॒क्षो॒घ्ने॑ स्वाहा ॥ 16 (5)

1.6 ये देवाः (अनुषङ्गं)

ये दे॒वाः पु॒र॒स्स॒दो॒ऽग्नि॑ नै॒त्रा र॒क्षो॒ह॒ण॒स्तेनः॑ पा॒न्तु ते नो॑ऽव॒न्तु
 तेभ्यो॑ नम॒स्तेभ्य॑ स्स्वाहा
 ये दे॒वा दक्षि॑ण॒स॒दो॒ यम॑ नै॒त्रा र॒क्षो॒ह॒ण॒स्तेनः॑ पा॒न्तु ते नो॑ऽव॒न्तु
 तेभ्यो॑ नम॒स्तेभ्य॑ स्स्वाहा
 ये दे॒वाः प॒श्चा॒त्स॒द॒ स्स॒वि॒तृ नै॒त्रा र॒क्षो॒ह॒ण॒स्तेनः॑ पा॒न्तु ते नो॑ऽव॒न्तु
 तेभ्यो॑ नम॒स्तेभ्य॑ स्स्वाहा
 ये दे॒वा उ॒त्त॒र॒स॒दो॒ वरु॑ण॒ने॒त्रा र॒क्षो॒ह॒ण॒स्तेनः॑ पा॒न्तु ते नो॑ऽव॒न्तु
 तेभ्यो॑ नम॒स्तेभ्य॑ स्स्वाहा
 ये दे॒वा उ॒प॒रि॒ष॒दो॒ बृ॒ह॒स्प॒ति॑ ने॒त्रा र॒क्षो॒ह॒ण॒स्तेनः॑ पा॒न्तु ते नो॑ऽव॒न्तु
 तेभ्यो॑ नम॒स्तेभ्य॑ स्स्वाहा॒ऽग्नये॑
 र॒क्षो॒घ्ने॑ स्वाहा
 य॒माय॑ र॒क्षो॒घ्ने॑ स्वाहा
 स॒वि॒त्रे र॒क्षो॒घ्ने॑ स्वाहा

वरुणाय रक्षोघ्ने स्वाहा

बृहस्पतये दुवस्वते रक्षोघ्ने स्वाहा ॥ 16A (5A)

1.7 आयुष्कामेष्टि मन्त्राः

TS 2.3.10.3 for para no.17

अ॒ग्निरा॒युष्मान्त्स॒ वन॒स्पति॑भि॒-रा॒युष्मान् ते॒नत्वा॑ऽऽयु॒षाऽऽयु॑ष्मन्तं करोमि,
 सोम॒ आयु॑ष्मान्त्स॒ ओष॑धीभिर्,
 य॒ज्ञ आयु॑ष्मान्त्स॒ दक्षि॑णाभिर्,
 ब्र॒ह्मायु॑ष्मत्तद् ब्रा॒ह्मणै॑-रा॒युष्मद्,
 दे॒वा आयु॑ष्मन्तस्ते॒ ऽमृ॒तेना॑ यु॒ष्मन्तस्ते॒नत्वा॑
 ऽऽयु॒षाऽऽयु॑ष्मन्तं करोमि ॥ 17 (6)

1.8 आयुष्कामेष्टि मन्त्राः (अनुषङ्गं)

अ॒ग्निरा॒युष्मान्त्स॒ वन॒स्पति॑भि॒ रा॒युष्मान् ते॒नत्वा॑ ऽऽयु॒षाऽऽयु॑ष्मन्तं करोमि
 सोम॒ आयु॑ष्मान्त्स॒ ओष॑धीभि॒रायु॑ष्मान् ते॒नत्वा॑ ऽऽयु॒षाऽऽयु॑ष्मन्तं करोमि
 य॒ज्ञ आयु॑ष्मान्त्स॒ दक्षि॑णाभि॒रायु॑ष्मान् ते॒नत्वा॑ ऽऽयु॒षाऽऽयु॑ष्मन्तं करोमि
 ब्र॒ह्मायु॑ष्मत्तद् ब्रा॒ह्मणै॑-रा॒युष्मत् ते॒नत्वा॑ ऽऽयु॒षाऽऽयु॑ष्मन्तं करोमि दे॒वा
 आयु॑ष्मन्तस्ते॒ ऽमृ॒ते-नायु॑ष्मन्तस्ते॒नत्वा॑ ऽऽयु॒षाऽऽयु॑ष्मन्तं करोमि ॥

17A(6A)

1.9 अगंहोमुच मन्त्राः

TS 2.3.13.1, for para No. 18

या॑ वा॒मिन्द्रा॑ वरु॒णा यत॑व्या तनू॒स्तये॑ मम॑ह॒सो मुञ्च॑तं ,
 या॑ वा॒मिन्द्रा॑ वरु॒णा सह॑स्या, रक्ष॑स्या, तेज॑स्या,
 तनू॒स्तये॑ मम॑ह॒सो मुञ्च॑तं,
 यो॑ वा॒मिन्द्रा॑ वरु॒णा वग्नौ॑ स्राम॒स्तं वा॑ मे॒तेना॑ वय॒जे,
 यो॑ वा॒मिन्द्रा॑ वरु॒णा द्वि॒पाथ्सु॑ प॒शुषु॑, चतु॑ष्पाथ्सु,
 गो॒ष्ठे, गृ॒हे—, ष्व॒प्सोष॑धीषु, वन॒स्पति॑षु,
 स्राम॒स्तं वा॑ मे॒तेना॑ वय॒जे ॥ 18 (7)

1.10 अगंहोमुच मन्त्राः (अनुषङ्गं)

या॑ वा॒मिन्द्रा॑ वरु॒णा यत॑व्या तनू॒स्तये॑ मम॑ह॒सो मुञ्च॑तं
 या॑ वा॒मिन्द्रा॑ वरु॒णा सह॑स्या तनू॒स्तये॑ मम॑ह॒सो मुञ्च॑तं
 या॑ वा॒मिन्द्रा॑ वरु॒णा रक्ष॑स्या तनू॒स्तये॑ मम॑ह॒सो मुञ्च॑तं
 या॑ वा॒मिन्द्रा॑ वरु॒णा तेज॑स्या तनू॒स्तये॑ मम॑ह॒सो मुञ्च॑तं
 यो॑ वा॒मिन्द्रा॑ वरु॒णा वग्नौ॑ स्राम॒स्तं वा॑ मे॒तेना॑ वय॒जे
 यो॑ वा॒मिन्द्रा॑ वरु॒णा द्वि॒पाथ्सु॑ प॒शुषु॑ स्राम॒स्तं वा॑ मे॒तेना॑ वय॒जे

यो॑ वा॒मिन्द्रा॑ वरु॒णा च॑तु॒ष्पाथ्सु॑ स्राम॒स्तं वा॑मे ते॒ना व॑यजे
 यो॑ वा॒मिन्द्रा॑ वरु॒णा गो॒ष्ठे स्राम॒स्तं वा॑मे ते॒ना व॑यजे
 यो॑ वा॒मिन्द्रा॑ वरु॒णा गृ॒हेषु॑ स्राम॒स्तं वा॑मे ते॒ना व॑यजे
 यो॑ वा॒मिन्द्रा॑ वरु॒णाऽप्सु॑ स्राम॒स्तं वा॑मे ते॒ना व॑यजे
 यो॑ वा॒मिन्द्रा॑ वरु॒णौष॑धीषु स्राम॒स्तं वा॑मे ते॒ना व॑यजे
 यो॑ वा॒मिन्द्रा॑ वरु॒णा व॒नस्प॑तिषु स्राम॒स्तं वा॑मे ते॒ना व॑यजे ॥ (18A)(7A)

1.11 शास्तृ सूक्तं (आप्यं)

TS 5.7.4.3 for para 19

अ॒ग्ने य॑श॒स्विन॑. य॒श॒से म॑म॒र्पये॑न्द्रा॒वती॑ म॒पचि॑ती मिहा॒वह॑ ।
 अ॒यं मूर्ध्ना॑ प॒रमे॑ष्ठी सु॒वर्चा॑-स्स॒माना॑ना मु॒त्तम॑ श॒लोको॑ अस्तु ।
 भ॒द्रं प॑श्यन्त॒ उप॑सेदु॒रग्रे॑ तपो॒ दीक्षा॑ मृष॒य स्सु॑वर्वि॒दः ।
 ततः॑ क्ष॒त्रं ब॑लमोज॒श्च जा॑तं तद॒स्मै दे॒वा अ॑भि॒सन्न॑-मन्तु ।
 धा॒ता वि॑धा॒ता प॑रमो॒त स॒न्दृक् प्र॑जाप॒तिः प॑रमे॒ष्ठी वि॑राजा॑ ।
 स्तो॒मा-श्च॒न्दा॒सि नि॒विदो॑म आ॒हुरे॒तस्मै॑ रा॒ष्ट्रम॑भि-सन्न॒माम॑ ।
 अ॒भ्याव॑र्त्त॒द्ध्व-मु॑पमे॒त सा॒कम॑य॒ शास्ता॑-ऽधि॒पति॑र्वो अस्तु ।
 अ॒स्य वि॒ज्ञान॑मनु॒स॒-र॑भ॒द्ध्वमि॑मं प॒श्चाद॑नु जी॒वाथ॑ सर्वे॑ ॥ 19 (8)

1.12 राष्ट्रभृतं

TS 3.4.7.1, for para No. 20

ऋ॒ता॒षा॒ड् ऋ॒त॒धा॒मा॒ऽग्नि॒र्-गन्ध॑र्व॒स्त-स्यौ॑ष॒धयो॑ऽप्सर॒स
 ऊ॒र्जो॑ नाम॒ स इ॒दं ब्र॑ह्म॒ क्षत्रं॑ पा॒तु ता॒ इदं॑ ब्र॒ह्म क्ष॒त्रं पा॑न्तु
 तस्मै॑ स्वा॒हा ता॒भ्य स्स्वा॑हा ,
 स॒हो॒वि॒तो वि॒श्वसा॑मा॒ सूर्यो॑ गन्ध॒र्व-स्त॑स्य मरी॒चयो॑ऽप्सर॒स आ॒युव॑ ,
 स्सु॒षु॒म्न स्सूर्य॑ र॒श्मि-श्च॑न्द्र॒मा गन्ध॑र्व-स्त॒स्य नक्ष॑त्राण्य-
 प्स॒रसो॑ बे॒कुर॑यो,
 भु॒ज्युस्सु॑पर्णो॒ यज्ञो॑ गन्ध॒र्व-स्त॑स्य दक्षि॒णा अ॑प्सर॒स स्त॑वाः,
 प्र॒जाप॑तिर्-वि॒श्वकर्मा॑ मनो॒ गन्ध॑र्वस्त॒स्यर्ख् सामा॑न्य-प्सर॒सो वह॑य,
 इ॒षिरो॑ वि॒श्व व्य॑चा वा॒तो गन्ध॑र्व-स्त॒स्यापो॑ ऽप्सर॒सो मु॒दा,
 भु॒वन॑स्य प॒ते यस्य॑त॒ उप॑रि गृ॒हा इ॒ह च॑ ।
 स नो॑ रा॒स्वाज्या॑नि॒ऽरा॒यस्पोष॑ऽसु॒वीर्य॑ऽसम्॑व॒त्सरी॑णा॒ऽस्व॒स्तिं ।
 पर॑मे॒ष्यधि॑पतिर्-मृ॒त्युर् गन्ध॑र्व-स्त॒स्य वि॒श्वम॑प्सर॒सो भुव॑,
 स्सु॒क्षि॒थि-स्सु॑भूतिर्-भ॒द्रकृ॑त् सु॒वर्वा॑न् प॒र्जन्यो॑ गन्ध॒र्व-स्त॑स्य
 वि॒द्युतो॑ ऽप्सर॒सो रु॒चो,

दूरे॑ हे॒तिर-मृ॒डयो॑ मृ॒त्युर् गन्धर्व-॑स्तस्य॒ प्रजा॑ अ॒प्सरसो॑ भीरुवः,
 चारुः॑ कृ॒पण॑ का॒शी का॒मो गन्धर्व-॑स्तस्या॒धयो॑ ऽप्सरस॑ इ॒शाच॑यन्तीर,
 नाम॒ स इ॒दं ब्र॒ह्म क्ष॒त्रं पा॑तु ता इ॒दं ब्र॒ह्म क्ष॒त्रं पा॑न्तु तस्मै॒ स्वाहा॒
 ताभ्य॑ स्स्वाहा,
 स नो॑ भुवनस्य॒ पते॑ यस्य॒त उ॒परि॑ गृ॒हा इ॒ह च॑ ।
 उरु॑ ब्र॒ह्मणे॒ऽस्मै क्ष॒त्राय॑ म॒हि श॒र्म य॒च्छ ॥ 20 (9)

1.13 राष्ट्रभृतं (अनुषङ्गं)

ऋ॒ताषा॑ड् ऋ॒तधा॑मा॒ऽग्निर-॑गन्धर्वस्स-इ॒दं ब्र॒ह्म क्ष॒त्रं पा॑तु तस्मै॒ स्वाहा॒
 तस्यौष॑धयो॒ऽप्सरस॑ ऊ॒र्जो नाम॑ ता इ॒दं ब्र॒ह्म क्ष॒त्रं पा॑न्तु ताभ्य॑ स्स्वाहा
 स॒ऽहि॒तो वि॒श्वसा॑मा॒ सूर्यो॑ गन्धर्वस्स इ॒दं ब्र॒ह्म क्ष॒त्रं पा॑तु तस्मै॒ स्वाहा॒
 तस्य॑ म॒रीच॑यो॒ऽप्सरस॑ आ॒युवो॑ नाम॒ ता इ॒दं ब्र॒ह्म क्ष॒त्रं पा॑न्तु
 ताभ्य॑ स्स्वाहा
 सु॒षुम्न॑स्सूर्य-र॒श्मिश्च॑न्द्र॒मा गन्धर्व॑स्स इ॒दं ब्र॒ह्म क्ष॒त्रं पा॑तु तस्मै॒ स्वाहा॒
 तस्य॑ नक्ष॒त्राण्य॑ ऽप्सरसो॒ बेकुर॑यो॒ नाम॑ ता इ॒दं ब्र॒ह्म क्ष॒त्रं पा॑न्तु
 ताभ्य॑ स्स्वाहा

भु॒ज्युस्सु॒पर्णो॑ य॒ज्ञो गन्ध॑र्वस्स इ॒दं ब्र॒ह्म क्ष॒त्रं पा॒तु तस्मै॑ स्वाहा
 तस्य॑ दक्षि॒णा अ॒प्सर॑स॒स्तवा॑ नाम॒ ता इ॒दं ब्र॒ह्म क्ष॒त्रं पा॒न्तु॑
 ताभ्य॑ स्स्वाहा॑

प्र॒जाप॑तिर्-वि॒श्वक॑र्मा॒ मनो॑ गन्ध॑र्वस्स इ॒दं ब्र॒ह्म क्ष॒त्रं पा॒तु तस्मै॑ स्वाहा
 तस्य॑र्ख् सामान्य॑-ऽप्सर॑सो व॒ह्यो नाम॒ ता इ॒दं ब्र॒ह्म क्ष॒त्रं पा॒न्तु॑ ताभ्य॑
 स्स्वाहे॒षिरो॑ वि॒श्वव्य॑चा॒ वातो॑ गन्ध॑र्वस्स इ॒दं ब्र॒ह्म क्ष॒त्रं पा॒तु तस्मै॑
 स्वाहा॒तस्यापो॑-ऽप्सर॑सो मु॒दा नाम॒ ता इ॒दं ब्र॒ह्म क्ष॒त्रं पा॒न्तु॑ ताभ्य॑
 स्स्वाहा॑

भु॒व॒नस्य॑ प॒ते यस्य॑त॒ उपरि॑ गृ॒हा इ॒ह च॑ । स नो॑ रा॒स्वाज्या॑निः
 रा॒यस्पोष॑ सु॒वीर्य॑ सम्॒वत्स॑रीणा॒ स्वस्ति॑ स्वाहा
 पर॑मे॒ष्ठ्यधि॑पतिर्-मृ॒त्युर॑ गन्ध॑र्वस्स इ॒दं ब्र॒ह्म क्ष॒त्रं पा॒तु तस्मै॑ स्वाहा
 तस्य॑ वि॒श्वम॑प्सर॒सो भुवो॑ नाम॒ ता इ॒दं ब्र॒ह्म क्ष॒त्रं पा॒न्तु॑ ताभ्य॑ स्स्वाहा
 सु॒क्षि॒थि-स्सु॑भूतिर॒भद्र॑कृ॒त् सुव॑र्वा॒न् पर्ज॑न्यो गन्ध॑र्वस्स इ॒दं ब्र॒ह्म क्ष॒त्रं
 पा॒तु तस्मै॑ स्वाहा
 तस्य॑ वि॒ध्युतो॑-ऽप्सर॑सो रु॒चो नाम॒ ता इ॒दं ब्र॒ह्म क्ष॒त्रं पा॒न्तु॑ ताभ्य॑
 स्स्वाहा॑

दूरे हेतिर मृडयो मृत्युर गन्धर्वस्स इदं ब्रह्म क्षत्रं पातु तस्मै स्वाहा
 तस्य प्रजा अप्सरसो भीरुवो नाम ता इदं ब्रह्म क्षत्रं पान्तु ताभ्य
 स्वाहा

चारुः कृपण काशी कामो गन्धर्वस्स इदं ब्रह्म क्षत्रं पातु तस्मै स्वाहा
 तस्याधयो ऽप्सरस इशोचयन्तीर् नाम ता इदं ब्रह्म क्षत्रं पान्तु ताभ्य
 स्वाहा

स नो भुवनस्यपते यस्यत उपरि गृहा इह च ।

उरु ब्रह्मणेऽस्मै क्षत्राय महि शर्म यच्छ स्वाहा ॥ (20A) (9A)

1.14 सर्प सूक्तं

TS 4.2.8.3 for para No. 21

नमो अस्तु सर्पेभ्यो ये के च पृथिवी मनु ।
 ये अन्तरिक्षे ये दिवि तेभ्य स्सर्पेभ्यो नमः ।
 येऽदो रोचने दिवो ये वा सूर्यस्य रश्मिषु ।
 येषामप्सु सदः कृतं तेभ्य स्सर्पेभ्यो नमः ।
 या इषवो यातु धानानां ये वा वनस्पती रनु ।
 ये वाऽवटेषु शेरते तेभ्य स्सर्पेभ्यो नमः ॥ 21 (10)

1.15 पञ्चचोडाः

TS 4.4.3.1 for para No. 22

अयं॑ पु॒रो॒ हरि॑केश॒ स्सूर्य॑रश्मि-स्तस्य॑ रथगृ॒त्सश्च॑ रथौजाश्च॑ सेनानि॑
ग्राम॑ण्यौ पु॒ज्जिक॑स्थला च कृतस्थला॑ चा॒प्सरसौ॑ यातु॑ धाना॑ हेती
रक्षा॑सि प्रहेति॑ ,

रयं॑ दक्षि॒णा वि॒श्व क॑र्मा तस्य॑ रथ॒ स्वनश्च॑ रथे-चि॒त्रश्च॑ सेनानि॑ ग्राम॑ण्यौ
मे॒नका॑ च सहज॒न्या चा॒प्सरसौ॑ द॒ङ्घ्णवः॑ प॒शवो॑ हेतिः॑ पौरु॑षेयो
वधः॑ प्रहेति॑ ,

रयं॑ पश्चाद् वि॒श्व-व्य॑चा स्तस्य॑ रथ॒ प्रोतश्चा॑-सम॒रथश्च॑ सेनानि॑ ग्राम॑ण्यौ
प्र॒म्लोच॑न्ती चा नु॒म्लोच॑न्ती-चा॒प्सरसौ॑ सर्पा॑ हेति॒र् व्याघ्राः॑ प्रहेति॑ ,

रय॑ मु॒त्तरा॑थ् सम्य॑द्वसु॒स्तस्य॑ से॒नजि॑च्च सु॒षेणश्च॑ सेनानि॑ ग्राम॑ण्यौ
वि॒श्वाची॑ च घृ॒ताची॑ चा-प्सरसा॑ वापो॑ हेति॒र् वातः॑ प्रहेति॑ ,

रय॑-मु॒पर्य॑र् वा॒ग्व-सु॒स्तस्य॑ ता॒क्ष्य-श्चा॒रिष्ट॑-नेमिश्च॑ सेनानि॑ ग्राम॑ण्या
वु॒र्वशी॑ च पू॒र्वचि॑त्तिश्चा-प्सरसौ॑ वि॒द्युद्धे॑ति-रव॒स्फूर्ज॑न् प्रहेति॑ ,

स्ते॒भ्यो नम॑स्ते नो मृ॒डय॑न्तु ते यं द्वि॒ष्मो यश्च॑ नो द्वेष्टि॑ तं वो
ज॒म्भे द॑धामि ॥ 22 (11)

1.16 पंचचोडाः (अनुषङ्गं)

अयं॑ पुरो॑ हरि॑केश॒ स्सूर्य॑रश्मि-स्तस्य॑ रथगृ॒त्सश्च॑ रथौ॑जाश्च॒ सेनानि॑
ग्राम॑ण्यौ पु॒ञ्जिक॑स्थला च कृत॑स्थला चा॒प्सरसौ॑ यातु॒धाना॑ हे॒ती
रक्षा॑सि प्रहे॑तिस्तेभ्यो नमस्ते नो मृ॒डयन्तु॑ ते यं द्वि॒ष्मो यश्च॑ नो द्वेष्टि॒ तं
ँवो॑ जंभे॒ दधाम् -

ययं॑ दक्षि॑णा विश्व॑कर्मा तस्य॑ रथस्वनश्च॒ रथे॑ चित्रश्च॒ सेनानि॑ ग्राम॑ण्यौ
मेन॑का च सहज॑न्या चा॒प्सरसौ॑ दड्॒ष्णवः॑ पश॑वो हे॒तिः पौरु॑षेयो वधः
प्रहे॑तिस्तेभ्यो नमस्ते नो मृ॒डयन्तु॑ ते यं द्वि॒ष्मो यश्च॑ नो द्वेष्टि॒ तं
ँवो॑ जंभे॒ दधाम् -

ययं॑ पश्चाद्-विश्व॑ व्य॒चा-स्तस्य॑ रथप्रो॑तश्चा-सम॑रथश्च॒ सेनानि॑ ग्राम॑ण्यौ
प्र॒म्लोच॑न्तीचा नु॒म्लोच॑न्ती-चा॒प्सरसौ॑ सर्पा॑ हे॒तिर् व्याघ्राः॑ प्रहे॑तिस्तेभ्यो
नमस्ते नो मृ॒डयन्तु॑ तेयं द्वि॒ष्मो यश्च॑ नो द्वेष्टि॒ तं
ँवो॑ जंभे॒ दधाम्-

यय॑-मु॒त्तरा॑थ् सम्य॑द्वसुस्तस्य॑ सेन॑जिच्च सु॒षेणश्च॑ सेनानि॑ ग्राम॑ण्यौ
वि॒श्वाची॑च घृ॒ताची॑चा-प्सर॑सा वापो हे॒तिर् वातः॑ प्रहे॑तिस्तेभ्यो नमस्ते
नो मृ॒डयन्तु॑ ते यं द्वि॒ष्मो यश्च॑ नो द्वेष्टि॒ तं
ँवो॑ जंभे॒ दधाम्-

यय॑मु॒पर्य॑र वाग्व॑सुस्तस्य॑ ताक्ष॑र्य-श्चा॒रिष्ट-नेमि॑श्च॒ सेनानि॑ ग्राम॑ण्या वु॒र्वशी॑
च पूर्॒वचि॑त्ति-श्चा॒प्सरसौ॑ वि॒द्युद्धे॑तिर-वस्फू॒र्जन् प्रहे॑तिस्तेभ्यो नमस्ते नो

मृडयन्तु ते यं द्विष्मो यश्च नो द्वेष्टि तं वो जंभे दधामि ॥ 22A(11A)

1.17 अप्रतिरथः

TS 4.6.4.1, for para No. 23 to 27

आशुः शिशानो वृषभो न युध्मो घनाघनः क्षोभण-श्चर्षणीनां ।
 संक्रन्दनोऽनिमिष एक वीरश्शतं सेना अजयत्साकमिन्द्रः ।
 संक्रन्दनेना निमिषेण जिष्णुना युत्कारेण दुश्च्यवनेन धृष्णुना ।
 तदिन्द्रेण जयत तथ् सहध्वं युधो नर इषु हस्तेन वृष्णा ।
 स इषुहस्तैः स निषंगिभिर्वशी स७ स्रष्टा स युध इन्द्रो गणेन ।
 स७सृष्टजिथ् सोमपा बाहु शर्ध्यूर्ध्व धन्वा प्रतिहिताभिरस्ता ।
 बृहस्पते परिदीया रथेन रक्षोहा मित्रा७ अप बाधमानः ॥ 23

प्रभञ्जन्त् सेनाः प्रमृणो युधा जयन्नस्माक-मेध्यविता रथानां ।
 गोत्रभिदं गोविदं वज्रबाहुं जयन्तमज्म प्रमृणन्त-मोजसा ।
 इमं सजाता अनुवीर-यध्व मिन्द्रं सखायोऽनु स७ रभध्वं ।
 बलविज्ञायः स्थविरः प्रवीर-स्सहस्वान् वाजी सहमान उग्रः ।
 अभिवीरो अभिसत्वा सहोजा जैत्रमिन्द्र रथमातिष्ठ गोवित् ॥ 24

अभिगोत्राणि सहसा गाहमानोऽदायो वीरश्शतमन्युरिन्द्रः ।

दु॒श्च॒य॒व॒नः॑ पृ॒त॒ना॒षा॒ड॒ यु॒ध्यो॑-स्मा॒क॒ꣳ से॒ना॒ अ॒व॒तु॑ प्र॒यु॒थ्सु॑ ।
 इ॒न्द्र॒ आ॒सां-ने॒ता बृ॒ह॒स्प॒ति॒र् दक्षि॑णा॒ य॒ज्ञः॒ पु॒र ए॒तु सो॒मः॑ ।
 दे॒व॒से॒ना॒ना-म॒भि॒भ॒ज्ज॒ती॒नां ज॒य॒न्ती॒नां म॒रु॒तो य॒न्त्व॒ग्रे॑ ।
 इ॒न्द्र॒स्य॒ वृ॒ष्णो॑ व॒रु॒ण॒स्य॒ रा॒ज्ञ आ॒दि॒त्या॒नां म॒रु॒ताꣳ श॒र्द्ध उ॒ग्रं॑ ।
 म॒हा॒म॒न॒सां भु॒व॒न॒च्य॒वा॒नां घो॒षो दे॒वा॒नां ज॒य॒ता मु॒द॒स्थात्॑ ।
 अ॒स्मा॒क॒-मि॒न्द्र-स्स॒मृ॒तेषु॑ ध्व॒जेष्व॒स्मा॒कं या॑ इ॒ष॒व॒स्ता ज॒य॒न्तु॑ ॥ 25

अ॒स्मा॒कं वा॑ी॒रा उ॒त्त॒रे भ॒व॒न्त्व॒स्मा॒नु दे॒वा अ॒व॒ता ह॒वेषु॑ ।
 उ॒द्ध॒र्ष॒य म॒घ॒व-त्रा॒यु॒धा-न्यु॒थ्स॒त्त्व॒नां मा॒म॒का॒नां म॒हाꣳसि॑ ।
 उ॒द्ध॒त्र॒ह॒न्-वा॒जि॒नां वा॒जि॒ना॒न्यु॒द्र॒था॒नां ज॒य॒ता॒मे॒तु घो॒षः॑ ।
 उ॒प॒प्रे॒त ज॒य॒ता न॒रः॒स्थि॒रा व॒स्स॒न्तु बा॒ह॒वः॑ ।
 इ॒न्द्रो॒ वः श॒र्म य॒च्छ त्व॒ना-धृ॒ष्या॒ य॒था॒स॒थ॑ ।
 अ॒व॒सृ॒ष्टा प॒रा॒प॒त श॒र॒व्ये ब्र॒ह्म सꣳशि॒ता॑ ॥ 26

ग॒च्छा॒मि॒त्रान् प्र॒वि॒श॒ मै॒षां क॒ञ्च॒नो॒च्छि॒षः॑ ।
 म॒र्मा॒णि ते॒ वर्म॑भि॒श्छा॒द॒या॒मि सो॒म॒स्त्वा रा॒जा ऽमृ॑ते॒ना॒भि-व॒स्तां॑ ।
 उ॒रो॒र्व॒री॒यो व॒रि॒व॒स्ते अ॒स्तु ज॒य॒न्तं॑ त्वा॒म॒नु म॒द॒न्तु दे॒वाः॑ ।
 य॒त्र बा॒णा-स्सं॒प॒त॒न्ति॑ कु॒मारा॑ वि॒शि॒खा इ॒व॑ ।
 इ॒न्द्रो न॒स्तत्र॑ वृ॒त्र॒हा वि॒श्वा॒हा श॒र्म य॒च्छ॒तु॑ ॥ 27 (12)

1.18 चमकं तृतीय अनुवाकः

TS 4.7.3.1 & 2 for para 28 and 29

शं च मे मयश्च मे प्रियं च मेऽनुकामश्च मे
कामश्च मे सौमनसश्च मे भद्रं च मे श्रेयश्च मे
वस्यश्च मे यशश्च मे भगश्च मे द्रविणं च मे
यन्ता च मे धर्ता च मे क्षेमश्च मे धृतिश्च मे
विश्वं च मे महश्च मे (28)

सम्विच्च मे ज्ञात्रं च मे
सूश्च मे प्रसूश्च मे सीरं च मे लयश्च मे
ऋतं च मेऽमृतं च मे ऽयक्ष्मं च मेऽनामयच्च मे
जीवातुश्च मे दीर्घायुत्वं च मेऽनमित्रं च मेऽभयं च मे
सुगं च मे शयनं च मे सूषा च मे सुदिनं च मे ॥ 29 (13)

1.19 विहव्यम्

TS 4.7.14.1 to TS 4.7.14.4 for para 30 to 33

ममाग्ने वर्चो विहवेष्वस्तु वयं त्वेन्धाना स्तनुवं पुषेम ।
मह्यं नमन्तां प्रदिशश्चतस्र स्त्वया-ऽद्ध्यक्षेण पृतना जयेम ।
मम देवा विहवे सन्तु सर्व इन्द्रावन्तो मरुतो विष्णुरग्निः ।

म॒मान्तरि॑क्ष मु॒रु गो॒पम॑स्तु म॒ह्यं वा॑तः प॒वतां॑ का॒मे अ॑स्मिन् ।
 म॒यि दे॒वा द्र॒विण॑ मा॒यज॑न्तां म॒य्या शी॑रस्तु म॒यि दे॒वहू॑तिः ॥ 30

दै॒व्या हो॑तारा व॒निष॑न्त पूर्वे ऽरि॑ष्टा-स्स्याम त॒नुवा॑ सु॒वीराः॑ ।
 म॒ह्यं य॑जन्तु म॒म या॑नि ह॒व्याऽऽकू॑ति स्स॒त्या म॑न॒सो मे॑ अस्तु ।
 ए॒नो मा॑निगां क॒तम॑च्च ना॒हं वि॑श्वे दे॒वासो॑ अधि॒वोच॑ ता मे ।
 दे॒वीष्प॑डुर् वी॒रुरु॑णः कृ॒णोत॑ वि॒श्वे दे॒वास इ॒ह वी॑र॒यद्ध्वं॑ ।
 मा॒हास्म॑हि प्र॒जया॑ मा त॒नूभि॑र् मा॒रधाम॑ द्विष॒ते सो॑म॒राज॑न् ।
 अ॒ग्निर्म॑न्युं प्र॒तिनु॑दन् पु॒रस्ता॑-द॒दब्धो॑ गो॒पाः परि॑पाहि न॒स्त्वं ॥ 31

प्र॒त्यञ्चो॑ यन्तु नि॒गुतः॑ पु॒नस्ते॑ ऽमै॒षां चि॑त्तं प्र॒बुधा॑ वि॒नेश॑त् ।
 धा॒ता धा॑तृणां भु॒वन॑स्य य॒स्पति॑र् दे॒वः स॒वितार॑म॒भि मा॑तिषा॒हं ।
 इ॒मं य॑ज्ञ म॒श्विनो॑भा बृ॒हस्प॑तिर् दे॒वाः पा॑न्तु य॒जमा॑नन् न्य॒र्थात् ।
 उ॒रुव्य॑चा नो म॒हिष॑ इ॒शर्म॑यः स॒दस्मि॑न् ह॒वे पु॑रु॒हूतः॑ पु॒रुक्षु॑ ।
 स नः॑ प्र॒जायै॑ ह॒र्यश्च॑ मृ॒डये॑न्द्र मा नो री॒रिषो॑ मा प॒रादाः॑ ॥ 32

ये न॑ स्स॒पत्ना॑ अ॒पते॑ भ॒वन्त्विन्द्रा॑-ग्नि॒भ्या म॑व बा॒धाम॑हे तान् ।
 व॒सवो॑ रु॒द्रा आ॑दि॒त्या उ॒परि॑ स्पृ॒शं मो॒ग्रं-चे॑त्ता॒रम॑धि रा॒जम॑क्रन् ।
 अ॒र्वाञ्च॑ मि॒न्द्र म॑मु॒तो ह॒वाम॑हे यो गो॒जिद्-ध॑न-जि॒दश्च॑-जि॒द्यः ।

इ॒म॒न्नो॒ य॒ज्ञं॑ वि॒ह॒वे जु॒ष॒स्वा॒स्य॒ कु॒र्मो॒ ह॒रि॒वो॒ मे॒दि॒नं॑ त्वा ॥ 33 (14)

1.20 मृगारः

TS 4.7.15.1 to TS 4.7.15.4 for para 34 to 40

अ॒ग्ने॒र् म॒न्वे प्र॒थ॒म॒स्य॒ प्र॒चे॒त॒सो॒यं पा॒ञ्च॒ज॒न्यं॑ ब॒हव॑ स्स॒मि॒न्धते॑ ।
वि॒श्व॒स्यां वि॒शि प्र॒वि॒वि॒शि॒वाꣳ स॒मी॒म॒हे स नो॑ मु॒ञ्च॒त्वꣳ ह॒सः॑ ।
य॒स्ये॒दं प्रा॒ण-॒न्नि॒मि॒षद् य॒दे॒ज॒ति॒ यस्य॑ जा॒तं ज॒न॒मा॒नं च॑ के॒वलं॑ ।
स्तौ॒म्य॒ग्निं ना॒थि॒तो जो॒ह॒वी॒मि स नो॑ मु॒ञ्च॒त्वꣳ ह॒सः॑ ।
इ॒न्द्र॒स्य म॒न्ये प्र॒थ॒म॒स्य॒ प्र॒चे॒त॒सो वृ॒त्र॒घ्नः स्तो॒मा उप॒मा मु॒पा॒गुः ।
यो दा॒शु॒षः सु॒कृ॒तो ह॒व॒मु॒प ग॒न्ता स नो॑ मु॒ञ्च॒त्वꣳ ह॒सः॑ ॥ 34

य स्सं॒ग्रा॒मं न॒य॒ति सँ॒व॒शी यु॒धे यः पु॒ष्टा॒नि सꣳसृ॒ज॒ति त्र॒या॒णि ।
स्तौ॒मी॒न्द्रं ना॒थि॒तो जो॒ह॒वी॒मि स नो॑ मु॒ञ्च॒त्वꣳ ह॒सः॑ ।
म॒न्वे॒वां मि॒त्रा॒व॒रु॒णा त॒स्य वि॒त्तꣳ स॒त्यौ॒ज॒सा दृꣳह॒णा यं नु॒दे॒थे॑ ।
या रा॒जा॒नꣳ स॒र॒थं या॒थ उ॒ग्रा ता नो॑ मु॒ञ्च॒त मा॒ग॒सः॑ ।
यो वाꣳ र॒थ ऋ॒जु॒र॒श्मिः स॒त्य॒ध॒र्मा मि॒थु-॒श्च॒र॒न्त-मु॒प॒या॒ति दू॒ष॒य॒न् ॥ 35

स्तौ॒मि मि॒त्रा॒व॒रु॒णा ना॒थि॒तो जो॒ह॒वी॒मि तौ नो॑ मु॒ञ्च॒त मा॒ग॒सः॑ ।
वा॒यो-॒स्स॒वि॒तु॒र् वि॒द॒था॒नि म॒न्म॒हे या॒वा॒त्म॒न्-व॒द्वि॒भृ॒तो यौ च॑ र॒क्ष॒तः॑ ।

यौ विश्वस्य परिभू बभूवतुस्तौ नो मुञ्चत मागसः ।

उपश्रेष्ठान आशिषो देवयोर्धर्मे अस्थिरन् ।

स्तौमि वायुं सवितारं नाथितो जोहवीमि तौ नो मुञ्चत मागसः ।

रथीतमौ रथीना मह ऊतये शुभंगमिष्ठौ सुयमे-भिरश्वैः ॥ 36

ययौर्वा देवौ देवेष्व-निशित मोजस्तौ नो मुञ्चत मागसः ।

यदयातं वँहतुं सूर्याया-स्त्रिचक्रेण सः सदमिच्छमानौ ।

स्तौमि देवा वश्विनौ नाथितो जोहवीमि तौ नो मुञ्चत मागसः ।

मरुतां मन्वे अधिनो ब्रुवन्तु प्रेमां वाचं विश्वामवन्तु विश्वे ।

आशून् हुवे सुयमानूतये ते नो मुञ्चन्त्वेनसः ।

तिग्ममायुधं वीडितं सहस्वद दिव्यं शर्द्धः पृतनासु जिष्णु ॥ 37

स्तौमि देवान् मरुतो नाथितो जोहवीमि ते नो मुञ्चन्त्वेनसः ।

देवानां मन्वे अधि नो ब्रुवन्तु प्रेमां वाचं विश्वामवन्तु विश्वे ।

आशून् हुवे सुयमानूतये ते नो मुञ्चन्त्वेनसः ।

यदिदं माऽभिश्चोचति पौरुषेयेण दैव्येन ।

स्तौमि विश्वान् देवान् नाथितो जोहवीमि ते नो मुञ्चन्त्वेनसः ।

अनुनो-ऽद्यानुमतिरन्विदनु मते त्वं वैश्वानरो न ऊत्या पृष्टो दिवि । 38

Below is the full text of the concised Mantra given in "italics" above.

This concised Mantra is formed by adding the First word/part from the first part of the First para , 2nd word /part from first part of Second para of Full Mantra which is given below. Add the Underlined words of the Full Mantra to arrive at the above concised Mantra. It is more appropriate to chant the full version as given below. Please refer to your Guru for any clarifications/explanations.

अ॒नु॒नो॒ऽध्या॒नु॒मति॑र् य॒ज्ञं दे॒वेषु॑ म॒न्यतां॑ । अ॒ग्निश्च॑ ह॒व्य वा॒हनो॑ भ॒वतां॑

दा॒शुषे॑ म॒यः ।

अ॒न्वि॒दनु॑मते॒ त्वं म॑न्यासै॒ शंच॑ नः कृ॒धि ।

क्र॒त्वे द॒क्षाय॑ नो हि॒नु प्र॒ण आ॒यू॒षि ता॑रिषः ॥ 38A

वै॒श्वान॑रो न ऊ॒त्या ऽऽप्र॑यातु॒ परा॑वतः । अ॒ग्निरु॒क्थेन॑ वा॒हसा॑ ।

पृ॒ष्ठो दि॒वि पृ॒ष्ठो अ॒ग्निः पृ॒थिव्यां॑ पृ॒ष्ठो वि॒श्वा ओष॑धीरा-वि॒वेश॑ ।

वै॒श्वान॑र स्सह॒सा पृ॒ष्ठो अ॒ग्निस्स॑नो दि॒वा स॑रिषः पा॒तु न॑क्तं ॥

38BExpansion Ref . 38a - in TS 3.3.11.3 / 38b - in TS 1.5.11.1

ये अ॒प्र॒थेता॑ म॒मिते॑भि॒ रोजो॑भि॒ र्ये प्र॑ति॒ष्ठे अ॒भ॒वतां॑ व॒सूनां॑ ।

स्तौ॑मि द्या॒वापृ॑थि॒वी ना॑थि॒तो जो॑ह॒वीमि॑ ते नो मु॒ञ्च॒तम॑ ह॒सः ।

उ॒र्वी रो॑द॒सी व॑रि॒वः कृ॑णो॒तं क्षे॑त्र॒स्य प॑त्नी अ॒धिनो॑ ब्रू॒यातं॑ ।

स्तौ॑मि द्या॒वापृ॑थि॒वी ना॑थि॒तो जो॑ह॒वीमि॑ ते नो मु॒ञ्च॒तम॑ ह॒सः ।

य॒त्ते व॒यं पु॒रुष॑त्रा॒य वि॒ष्ठा वि॒द्वा स॒श्च कृ॒मा क॒च्च ना॑गः ॥ 39

कृ॒धी स्व॑स्मा॒ अदि॑ते॒रना॑गा व्ये॒नासि॑ शि॒श्रथो॑ वि॒ष्वग॑ग्ने ।

यथा ह तद् वसवो गौर्यं चित् पदिषिता ममुञ्चता यजत्राः ।

एवा त्वमस्मत् प्रमुञ्चा व्यञ्हः प्रातार्यग्ने प्रतरान्न आयुः ॥ 40 (15)

1.21 सर्पाहुती मन्त्राः

TS 5.5.10.1 to TS 5.5.10.3, for para 41

समीची नामासि प्राची दिक्तस्यास्ते ऽग्निरधिपति रसितो रक्षिता
यश्चाधिपतिर् यश्च गोप्ता ताभ्यां नमस्तौ नो मृडयतां ते यं द्विष्मो
यश्च नो द्वेष्टि तं वाँ जंभे दधाम्यो-

-जस्विनी नामासि दक्षिणा दिक्तस्यास्त इन्द्रोऽधिपतिः पृदाकुः ,
प्राची नामासि प्रतीची दिक्तस्यास्ते सोमोऽधिपति स्स्वजो ,
ऽवस्थावा नामा-स्युदीची दिक्तस्यास्ते वरुणोऽधिपति-स्तिरश्च राजि,
-रधिपत्नी नामासि बृहती दिक्तस्यास्ते बृहस्पति-रधिपति इश्चित्रो,
वशिनी नामासी यं दिक्तस्यास्ते यमोऽधिपतिः कल्माष ग्रीवो,
रक्षिता यश्चाधिपतिर् यश्च गोप्ता ताभ्यां नमस्तौ नो मृडयतां
ते यं द्विष्मो यश्च नो द्वेष्टि तं वाँ जंभे दधामि ॥ 41 (16)

1.22 सर्पाहुती मन्त्राः (अनुषङ्गं)

समीची नामासि प्राची दिक्तस्यास्ते ऽग्निरधिपति रसितो रक्षिता-
यश्चाधिपतिर् यश्च गोप्ता ताभ्यां नमस्तौ नो मृडयतां ते यं द्विष्मो

यश्च॑ नो॒ द्वेष्टि॑ तं॒ वां॑ ज॒म्भे॑ द॒धाम् -

यो॒ज॒स्विनी॑ नामा॒सि दक्षि॑णा दि॒क्तस्या॑स्त इन्द्रोऽधि॑पतिः पृ॒दाकू॑

रक्षि॑ता यश्चाधि॑पतिर॒ यश्च॑ गो॒प्ता ताभ्यां॑ नमस्तौ नो॑ मृ॒डय॑तां ते यं द्वि॒ष्मो
यश्च॑ नो॒ द्वेष्टि॑ तं॒ वां॑ ज॒म्भे॑ द॒धामि॑

प्रा॒ची नामा॒सि प्र॒तीची॑ दि॒क्तस्या॑स्ते सोमोऽधि॑पति स्स्व॒जो रक्षि॑ता

यश्चाधि॑पतिर् यश्च॑ गो॒प्ता ताभ्यां॑ नमस्तौ नो॑ मृ॒डय॑तां ते यं द्वि॒ष्मो यश्च॑ नो॒
द्वेष्टि॑ तं॒ वां॑ ज॒म्भे॑ द॒धाम् -

यव॑स्थावा नामा॒स्युदी॑ची दि॒क्तस्या॑स्ते वरु॒णोऽधि॑पति-स्तिरश्च॑ रा॒जी

रक्षि॑ता यश्चाधि॑पतिर्-यश्च॑ गो॒प्ता ताभ्यां॑ नमस्तौ नो॑ मृ॒डय॑तां ते यं द्वि॒ष्मो
यश्च॑ नो॒ द्वेष्टि॑ तं॒ वां॑ ज॒म्भे॑ द॒धाम्

यधि॑पत्नी नामा॒सि बृ॒हती॑ दि॒क्तस्या॑स्ते बृ॒हस्प॑ति-रधि॑पतिः श्वि॒त्रो रक्षि॑ता

यश्चाधि॑पतिर् यश्च॑ गो॒प्ता ताभ्यां॑ नमस्तौ नो॑ मृ॒डय॑तां ते यं द्वि॒ष्मो यश्च॑ नो॒
द्वेष्टि॑ तं॒ वां॑ ज॒म्भे॑ द॒धामि॑

वशि॑नी नामा॒सीयं॑ दि॒क्तस्या॑स्ते यमोऽधि॑पतिः कल्मा॑ष ग्री॒वो रक्षि॑ता

यश्चाधि॑पतिर् यश्च॑ गो॒प्ता ताभ्यां॑ नमस्तौ नो॑ मृ॒डय॑तां ते यं द्वि॒ष्मो यश्च॑ नो॒
द्वेष्टि॑ तं॒ वां॑ ज॒म्भे॑ द॒धामि॑ ॥ 41A (16A)

1.23 गन्धर्वाहुतीः

TS 5.5.10.4 to TS 5.5.10.5, for para 42

हे॒तयो॑ नाम॒स्थ ते॒षां॑ ँ॒वः पु॒रो गृ॒हा अ॒ग्निर्व॑ इ॒षव॑ स्सल॒िलो,
 नि॒लिपां॑ नाम॒स्थ ते॒षां॑ ँ॒वो दक्षि॑णा गृ॒हाः पि॒तरो॑ व इ॒षव॑ स्सग॒रो,
 वज्रि॑णो नाम॒स्थ ते॒षां॑ ँ॒वः प॒श्चाद्-गृ॒हा स्स्व॒प्नो व॑ इ॒षवो॑ ग॒ह्वरो॑,
 ऽव॒स्थावा॑नो नाम॒स्थ ते॒षां॑ ँ॒व उत्त॑राद् गृ॒हा आ॒पो व॑ इ॒षव॑ स्समु॒द्रो-
 ऽधि॑पतयो॒ नाम॒स्थ ते॒षां॑ ँ॒व उ॒परि॑ गृ॒हा व॒र्षं॑ ँ॒व इ॒षवो॑ ऽव॒स्वान्,
 क्र॒व्या नाम॒स्थ पा॒र्त्थि॒वा-स्ते॒षां॑ ँ॒व इ॒ह गृ॒हा अ॒न्नं॑ ँ॒व इ॒षवो॑ नि॒मिषो॑,
 वा॒त नामं॑ ते॒भ्यो॑ वो नम॒स्ते नो॑ मृ॒डय॑त ते यं द्वि॒ष्मो यश्च॑ नो द्वेष्टि॒ तं॑ वो॒
 ज॒म्भे द॑धामि ॥ 42 (17)

1.24 गन्धर्वाहुतीः (अनुषङ्गं)

हे॒तयो॑ नाम॒स्थ ते॒षां॑ ँ॒वः पु॒रो गृ॒हा अ॒ग्निर्व॑ इ॒षव॑-स्सल॒िलो वा॒त नामं॑
 ते॒भ्यो॑ वो नम॒स्ते नो॑ मृ॒डय॑त ते यं द्वि॒ष्मो यश्च॑ नो द्वेष्टि॒ तं॑ वो॒ ज॒म्भे
 द॑धामि

निलि॑पां॒ नाम॑स्थ॒ तेषां॑ ॥१॥ वो॑ दक्षि॒णा गृ॒हाः पि॒तरो॑ व इ॒षव॑-स्स॒गरो॑ वा॒त
नामं॑ तेभ्यो॑ वो॒ नम॑स्ते नो॑ मृडय॒त ते यं॑ द्वि॒ष्मो यश्च॑ नो॒ द्वेष्टि॑ तं वो॒ जंभे॑
द॒धामि॑

वज्रि॑णो॒ नाम॑स्थ॒ तेषां॑ ॥२॥ वः॑ पश्चाद्-गृ॒हा स्स्व॒प्नो व इ॒षवो॑ ग॒ह्वरो॑ वा॒त
नामं॑ तेभ्यो॑ वो॒ नम॑स्ते नो॑ मृडय॒त ते यं॑ द्वि॒ष्मो यश्च॑ नो॒ द्वेष्टि॑ तं वो॒ जंभे॑
द॒धाम् -

यव॑स्था वा॒ नो नाम॑स्थ॒ तेषां॑ ॥३॥ व॑ उत्तराद् गृ॒हा आपो॑ व इ॒षव॑ स्समु॒द्रो
वा॒त नामं॑ तेभ्यो॑ वो॒ नम॑स्ते नो॑ मृडय॒त ते यं॑ द्वि॒ष्मो यश्च॑ नो॒ द्वेष्टि॑ तं वो॒
जंभे॑ द॒धाम् -

यधि॑पतयो॒ नाम॑स्थ॒ तेषां॑ ॥४॥ व॑ उपरि॑ गृ॒हा वर॑.षं॒ व इ॒षवो॑ऽव॒स्वान् वा॒त
नामं॑ तेभ्यो॑ वो॒ नम॑स्ते नो॑ मृडय॒त ते यं॑ द्वि॒ष्मो यश्च॑ नो॒ द्वेष्टि॑ तं वो॒ जंभे॑
द॒धामि॑

क्र॒व्या नाम॑स्थ॒ पार्थि॑वा-स्तेषां॑ ॥५॥ व॑ इ॒ह गृ॒हा अन्नं॑ व॒ इष॑वो नि॒मिषो॑ वा॒त
नामं॑ तेभ्यो॑ वो॒ नम॑स्ते नो॑ मृडय॒त ते यं॑ द्वि॒ष्मो यश्च॑ नो॒ द्वेष्टि॑ तं वो॒ जंभे॑
द॒धामि॑ ॥ 42A (17A)

1.25 अज्यानि मन्त्राः

TS 5.7.2.3 to TS 5.7.2.5 , for para 43

श॒तायु॑धाय॒ श॒तवी॑र्याय॒ श॒तो॒तये॑ ऽभि॒माति॑षाहे॑ ।
 श॒तं यो॑ न॒ इ॒शर॑दो अ॒जीता॑-नि॒न्द्रो ने॑ष॒दति॑ दुरि॒तानि॑ वि॒श्वा ।
 ये च॒त्वारः॑ प॒थयो॑ दे॒वयाना॑ अ॒न्तरा॑ द्यावापृ॒थिवी॑ वि॒यन्ति॑ ।
 तेषां॑ यो अ॒ज्यानि॑- म॒जीति॑-मा॒वहा॑त्तस्मै॒ नो दे॒वाः परि॑दत्तेह॒ सर्वे॑ ।
 ग्री॒ष्मो हे॑म॒न्त उ॒त नो॑ व॒सन्त॑ इ॒शर॑द् वर्॒षा स्सु॑वि॒तन्नो॑ अ॒स्तु ।
 तेषा॑-मृ॒तूनां॑ श॒तशार॑दाना-न्नि॒वात॑ ए॒षाम॑भये॒ स्याम॑ ।
 इ॒दुव॑त्स॒राय॑ परि॒वत्स॑राय॒ सम्व॑त्स॒राय॑ कृ॒णु॒ता बृ॑ह॒न्नमः॑ ।
 तेषां॑ व॒यं सु॑म॒तौ य॒ज्ञिया॑नां ज्यो॒गजी॑ता अ॒हता॑ स्स्याम ।
 भ॒द्रान्नः॑ श्रे॒य स्स॑म॒नैष्ट॑ दे॒वा स्त्वया॑ऽव॒सेन॑ स॒मशी॑ महि॒त्वा ।
 स॒नोम॑यो भूः पि॒तो आ॒विश॑स्व श॒तो॒काय॑ त॒नुवे॑ स्यो॒नः ॥ 43 (18)

TS 7.3.12.1, for para No. 44

भू॒तं भ॑व्यं भ॒विष्य॑द् व॒षट् थ्स्वा॒हा ,
 नम॑ ऋ॒ख् सा॒म-य॒जुर् व॒षट् थ्स्वा॒हा ,
 नमो॑ गा॒यत्री॑ त्रि॒ष्टुप् ज॒गती॑ व॒षट् थ्स्वा॒हा ,
 नमः॑ पृ॒थिव्य॑न्त॒रिक्षं॑ द्यौर् व॒षट् थ्स्वा॒हा ,
 नमो॑ ऽग्नि॒र्वायु॑-स्सू॒र्यो व॒षट् थ्स्वा॒हा ,

नमः प्रा॒णो-व्या॒नो-ऽपा॒नो व॒षट् थ्स्वाहा ,
 नमोऽन्नं कृ॒षिर् वृ॒ष्टिर् व॒षट् थ्स्वाहा ,
 नमः पि॒ता पु॒त्रः पौ॒त्रो व॒षट् थ्स्वाहा ,
 नमो भूर्भुव॒स्सुव॒र्वषट् थ्स्वाहा नमः ॥ 44 (19)

1.26 अथर्वशीर्षं

TB 1.5.8.1 to TB 1.5.8.3, for para 45, 46, 47

इन्द्रो दधी॑चो अस्त॒भिः । वृ॒त्राण्य॑ प्र॒तिष्कृ॑तः । जघा॑न नवती॒र्नव॑ ।
 इच्छ॑न्न-श्वस्य॒ यच्छि॑रः । पर्व॑तेष्वप॒श्रितं॑ । तद्वि॑दच्छ॒र्यणा॑वति ।
 अद्रा॑ह गो॒रम॑न्वत । नाम॒ त्वष्टु॑र-पी॒च्यं ॥ इ॒त्था च॒न्द्रम॑सो गृ॒हे ।
 इन्द्र॑मिद् गा॒थिनो॑ बृ॒हत् ॥ 45

इन्द्र॑ मर्के॒भि रर्कि॑णः । इन्द्रं॑ वा॒णीर॑नूषत । इन्द्र॑ इ॒द्धर्यो॑ स्सचा॒ ॥
 सं मि॒श्रल॑ आव॒चो यु॒जा ॥ इन्द्रो॑ वज्री॒ हिर॑ण्ययः । इन्द्रो॑ दी॒र्घाय॑ चक्ष॒से ।
 आसूर्य॑ रो॒हय॑द् दि॒वि । वि गो॑भिर॒द्रिमै॑रयत् ।
 इन्द्र॑ वा॒जेषु॑ नो अव । स॒हस्र॑ प्र॒धने॑षु च ॥ 46

उग्र॑ उ॒ग्राभि॑-रू॒तिभिः॑ । तमिन्द्रं॑ वा॒ जया॑मसि । महे॑ वृ॒त्राय॑ ह॒न्तवे॑ ।
 स वृ॒षा वृ॒षभो॑भुवत् । इन्द्र॑ स्सदा॒ मने॑ कृतः । ओजि॑ष्ठ स्स॒बले॑ हि॒तः ।

द्यु॒म्नी॒ श्लो॒की॒ स॒ सौ॒म्यः॒ । गि॒रा॒ वज्रो॒ न॒ संभृ॒तः॒ । स॒ब॒लो॒ अन॒प॒च्यु॒तः॒ ।
व॒वक्षु॒ रु॒गो अ॒स्तृ॒तः॒ ॥ 47 (20)

1.27 प्रत्यङ्गिरसः

T.B.2.4.2.1 to T.B.2.4.2.4, for para No 48 to 50

चक्षु॑षो हे॒ते॒ मन॑सो हे॒ते॒ । वा॒चो॑ हे॒ते॒ ब्र॒ह्म॑णो हे॒ते॒ ।
यो॒मा॒ऽघा॒यु-र॒भि॒दा॒स॒ति॒ । तम॑ग्ने मे॒न्या॒ऽमे॒निं॑ कृ॒णु॒ ।
यो॒मा॒ चक्षु॑षा यो॒ मन॑सा । यो॒ वा॒चा॒ ब्र॒ह्म॑णा॒ऽघा॒यु-र॒भि॒दा॒स॒ति॒ ।
तया॑ऽग्ने त्वं मे॒न्या॒ । अ॒मु॒म॒ मे॒निं॑ कृ॒णु॒ ।
यत् कि॒ञ्चा॒सौ॒ मन॑सा॒ यच्च॑ वा॒चा॒ । य॒ज्ञैर् जु॒हो॒ति॒ यजु॑षा॒ ह॒वि॒र्भिः॑ ॥ 48

तन् मृ॒त्युर् नि॒र्ऋ॒त्या॒ स॒म्वि॑दानः । पु॒रा॒ दि॒ष्टा॒ दा॒हु॒ती॒ र॒स्य॑हन्तु ।
या॒तु॒ धा॒ना॒ नि॒र्ऋ॒ति॒ रा॒दु॒रक्षः॑ । ते॒ अ॒स्य॑ध्नं त्वनृ॑तेन स॒त्यं॒ ।
इ॒न्द्र॒षि॒ता॒ आ॒ज्य॑मस्य म॒थ॒न॒न्तु॒ । मा॒त॒थ् स॒मृ॒द्धि॒ यद॒सौ॒ क॒रो॒ति॒ ।
ह॒न्मि॑तेऽहं कृ॒तं॑ ह॒विः॒ । यो॒ मे॒ घो॒र॒म॒ची॒ कृ॒तः॒ ।
अ॒पा॒ञ्चौ॒ त उ॒भौ॒ बा॒हू॒ । अ॒प॒न॒ह्या॒म्या॒स्यं॑ ॥ 49

अ॒प॒न॒ह्या॒मि॒ते॒ बा॒हू॒ । अ॒प॒ न॒ह्या॒म्या॒स्यं॑ । अ॒ग्ने॒र् दे॒व॒स्य॒ ब्र॒ह्म॑णा ।
स॒र्वं॑ ते॒ ऽव॒धि॒ष्ङ् कृ॒तं॑ । पु॒रा॒ऽमु॒ष्य॒ व॒षट् का॒रा॒त् । य॒ज्ञं॑ दे॒वेषु॑ न॒स्कृ॒धि॒ ।

स्विष्ट-मस्माकं भूयात् । माऽस्मान् प्रापन्नरातयः । अन्तिदूरे सतो अग्ने ।
भ्रातृव्यस्या भिदासतः । वषट् कारेण वज्रेण । कृत्यां हन्मि कृतामहं ।

यो मा नक्तं दिवा सायं । प्रात-श्वाहो निपीयति ।

अद्या-तमिन्द्र वज्रेण । भ्रातृव्यं पादयामसि ॥ 50 (21)

T.B.2.5.1.1 to T.B.2.5.1.3, for para 51 to 53

प्राणो रक्षति विश्वमेजत् । इर्यो भूत्वा बहुधा बहूनि ।
स इत्थं सर्वं व्यानशे । यो देवो देवेषु विभूरन्तः ।
आवृद्धात् क्षेत्रियद्ध्वगद् वृषा । तमित् प्राणं मनसोप शिक्षत ।
अग्रं देवाना-मिदमत्तु नो हविः । मनसश्चि-त्तेदं ।
भूतं भव्यं च गुप्यते । तद्धि देवेष्व-ग्रियं ॥ 51

आन एतु पुरश्चरं । सह देवै-रिमं हवं ।
मनः श्रेयसि श्रेयसि । कर्मन् यज्ञपतिं दधत् ।
जुषतां मे वागिदं हविः । विराड् देवी पुरोहिता ।
हव्यवाडन-पायिनी । यया रूपाणि बहुधा वदन्ति ।
पेशांसि देवाः परमे जनित्रे । सा नो विराडनप स्फुरन्ती ॥ 52
वाग्देवी जुषता मिदं हविः । चक्षुर् देवानां ज्योतिरमृते न्यक्तं ।

अस्य विज्ञानाय बहुधा निधीयते । तस्य सुम्न-मशीमहि ।

मा नो हासीद् विचक्षणं । आयुरिन्नः प्रतीर्यतां ।

अनन्धा-श्चक्षुषा वयं । जीवा ज्योति-रशीमहि ।

सुवर् ज्योति-रुतामृतं । श्रोत्रेण भद्र मुत-शृण्वन्ति सत्यं ।

श्रोत्रेण वाचं बहुधोद्यमानां । श्रोत्रेण मोदश्च महश्च श्रूयते ।

श्रोत्रेण सर्वा दिश आशृणोमि । येन प्राच्या उत दक्षिणा ।

प्रतीच्यै दिशः शृण्वन्त्युत्तरात् । तदिच्छ्रोत्रं बहुधोद्यमानं ।

अरान्न नेमिः परिसर्वं बभूव ॥ 53 (22)

T.B.2.7.7.1 to T.B.2.7.7.7, for para 54 to 60

सि॒हे व्याघ्र उत या पृ॒दाकौ । त्विषि-र॒ग्नौ ब्रा॒ह्मणे सूर्ये॒या ।

इन्द्रं॑ या दे॒वी सु॒भगा ज॒जान । सा न आ॒गन् वर्च॑सा सम्वि॒दाना ।

या रा॒ज॒न्ये दु॒न्दु-भा॒वाय॑तायां । अ॒श्वस्य॑ क्र॒न्द्ये पु॒रुष॑स्य मा॒यौ ।

इन्द्रं॑ या दे॒वी सु॒भगा ज॒जान । सा न आ॒गन् वर्च॑सा सम्वि॒दाना ।

या ह॒स्ति॒नि द्वी॒पि॒नि या हि॒रण्ये । त्विषि-र॒श्वेषु॑ पु॒रुषेषु॑ गोषु ॥ 54

इन्द्रं॑ या दे॒वी सु॒भगा ज॒जान । सा न आ॒गन् वर्च॑सा सम्वि॒दाना ।

रथे॑ अ॒क्षेषु॑ वृष॒भस्य॑ वा॒जे । वा॒ते पर्ज॑न्ये वरुणस्य शु॒ष्मे ।

इन्द्रं॑ या दे॒वी सु॒भगा ज॒जान । सा न आ॒गन् वर्च॑सा सम्वि॒दाना ।

रा॒डसि॑ वि॒राडसि॑ । स॒म्राडसि॑ स्व॒राडसि॑ ।

इन्द्राय॑ त्वा तेज॑स्वते तेज॑स्वन्त॒ श्रीणामि॑ ।

इन्द्राय॑ त्वौज॑स्वत ओज॑स्वन्त॒ श्रीणामि॑ ॥ 55

इन्द्राय॑ त्वा पय॑स्वते पय॑स्वन्त॒ श्रीणामि॑ ।

इन्द्राय॑ त्वाऽऽयु॑ष्मत आयु॑ष्मन्त॒ श्रीणामि॑ ।

तेजो॑ऽसि । तत्ते॑ प्रय॑च्छामि । तेज॑स्वदस्तु मे मुखं॑ ॥

तेज॑स्वच्छिरो अस्तु मे । तेज॑स्वान् विश्व॑तः प्रत्यङ् ।

तेज॑सा सं पिपृ॑ग्धिमा । ओजो॑ऽसि । तत्ते॑ प्रय॑च्छामि ॥ 56

ओज॑स्वदस्तु मे मुखं॑ । ओज॑स्वच्छिरो अस्तु मे ।

ओज॑स्वान् विश्व॑तः प्रत्यङ् । ओज॑सा संपिपृ॑ग्धि मा । पयो॑ऽसि ।

तत्ते॑ प्रय॑च्छामि । पय॑स्वदस्तु मे मुखं॑ । पय॑स्वच्छिरो अस्तु मे ।

पय॑स्वान् विश्व॑तः प्रत्यङ् । पय॑सा संपिपृ॑ग्धि मा ॥ 57

आयु॑रसि । तत्ते॑ प्रय॑च्छामि । आयु॑ष्मदस्तु मे मुखं॑ ।

आयु॑ष्मच्छिरो अस्तु मे । आयु॑ष्मान् विश्व॑तः प्रत्यङ् ।

आयु॑षा संपिपृ॑ग्धि मा । इ॒म म॑ग्न आयु॑षे वर्च॑से कृ॒धि ।

प्रि॒य॒ रे॒तो वरु॑ण सोम॑ राजन् । मा ते वा॒स्मा अदि॑ते शर्म॑ यच्छ ।

विश्वे॑ दे॒वा जर॑दष्टि॒र् यथा॑ऽसत् ॥ 58

आ॒यु॒रसि॑ वि॒श्वा॒यु॒रसि॑ । सर्वा॒यु॒रसि॑ सर्व॒मा॒यु॒रसि॑ । यतो॑ वा॒तो म॒नो॒जवाः॑ ।
यतः॑ क्ष॒रन्ति॑ सि॒न्धवः॑ । तासां॑ त्वा सर्वा॒सां रु॒चा ।

अ॒भिषि॑ञ्चामि वर्च॒सा । स॒मु॒द्र इ॒वासि॑ ग॒ह्व॒ना ॥ सोम॑ इ॒वास्य॑दा॒भ्यः ।
अ॒ग्निरि॑व वि॒श्वतः॑ प्र॒त्यङ् । सूर्य॑ इ॒व ज्योति॑षा वि॒भूः ॥ 59

अपां॑ यो द्र॒वणे॑ र॒सः । तम॑हम॒स्मा आ॒मुष्या॑य॒णाय॑ ।
तेज॑से ब्र॒ह्मव॑र्च॒साय॑ गृ॒ह्णामि॑ । अपां॑ य ऊ॒र्मो र॒सः ।
तम॑हम॒स्मा आ॒मुष्या॑य॒णाय॑ । ओज॑से वी॒र्या॑य गृ॒ह्णामि॑ ।
अपां॑ यो म॒द्ध्यतो॑ र॒सः । तम॑हम॒स्मा आ॒मुष्या॑य॒णाय॑ ।
पुष्टै॑ प्र॒जन॑नाय गृ॒ह्णामि॑ । अपां॑ यो य॒ज्ञियो॑ र॒सः ।
तम॑हम॒स्मा आ॒मुष्या॑य॒णाय॑ । आ॒युषे॑ दी॒र्घायु॑त्वाय गृ॒ह्णामि॑ ॥ 60 (23)

1.28 अन्न सूक्तं

T.B.2.8.8.1 to T.B.2.8.8.4, for para 61 to 63

अ॒हम॑स्मि प्रथ॒मजा॑ ऋ॒तस्य॑ । पूर्वं॑ दे॒वेभ्यो॑ अ॒मृत॑स्य ना॒भिः ।
यो मा॑ द॒दाति॑ स इ॒ देव॑ मा वाः । अ॒हम॑न्न म॒न्न म॑दन्त॒मग्नि॑ ।
पूर्व॑-म॒ग्नेर॑पि द॒हत्य॑न्नं । यत्तौ॑ हा॒साते॑ अ॒हमु॑त्तरेषु ।
व्या॒त्तम॑स्य प॒शव॑-स्सु॒जंभं॑ । प॒श्यन्ति॑ धी॒राः प्र॑च॒रन्ति॑ पा॒काः ।
जहा॑म्यन्यं न जहा॑म्यन्यं । अ॒हम॑न्नं व॒शमि॑च्च॒रामि॑ ॥ 61

स॒मान॒म॒र्थं॑ प॒र्ये॒मि भुं॑जत् । को मा म॒न्नं म॒नु॒ष्यो द॑येत ।
 प॒रा॒के अ॒न्नं नि॒हि॒तं लो॑क ए॒तत् । वि॒श्वे॒र् दे॒वैः पि॒तृ॒भिर् गु॒प्तम॑न्नं ।
 यद॒द्यते॑ लु॒प्यते॑ यत् प॒रो॒प्यते॑ । श॒त-त॒मी॒सा त॒नूर्मे॑ ब॒भूव॑ ।
 म॒हान्तौ॑ च॒रू स॒कृद् दु॒ग्धेन॑ प॒प्रौ । दि॒वञ्च॑ पृ॒श्नि पृ॒थि॒वीं च॑ सा॒कं ।
 तथ्सं॑-पि॒बन्तो॑ न॒मि॒नन्ति॑ वे॒धसः॑ । नै॒तद्भू॒यो भ॑वति नो क॒नीयः॑ ॥ 62

अ॒न्नं प्रा॒णम॑न्न म॒पान-मा॑हुः । अ॒न्नं मृ॒त्युं तमु॑ जी॒वातु॑ माहुः ।
 अ॒न्नं ब्र॒ह्मा॒णो ज॒रसं॑ व॒दन्ति॑ । अ॒न्नमा॑हुः प्र॒जन॑नं प्र॒जानां॑ ।
 मो॒घ-म॑न्नं वि॒न्दते॑ अ॒प्र॒चे॒ताः । स॒त्यं ब्र॑वीमि व॒ध इ॒थ्स त॒स्य ।
 ना॒र्य॒मणं॑ पु॒ष्यति॑ नो स॒खायं॑ । के॒व॒ला॒घो भ॑वति के॒व॒ला॒दी ।
 अ॒हं मे॒घ स्स्त॑नयन् व॒र्ष॒न्नस्मि॑ । मा॒म॒द॒न्त्य-ह॑म॒द्म्य॒न्यान् ॥
 अ॒हं स॒द॒मृ॒तो भ॑वामि । म॒दा॒दि॒त्या अ॒धि स॒र्वे त॑पन्ति । 63

1.29 वा॒ख् सू॒क्तं

T.B.2.8.8.4 for Para 64

दे॒वीं वा॒च॒म ज॑नयन्त यद् वा॒ग्वद॑न्ति । 64

Below is the full text of the concised Mantra given in "italics" above.

This concised Mantra is formed by adding the First word/part from the first part of the First para , 2nd word /part from first part of Second para of Full Mantra which is given below. Add the Underlined words of the Full Mantra to arrive at the above concised Mantra. It is more appropriate to chant the

full version as given below. Please refer to your Guru for any clarifications/explanations.

देवीं वाचमजनयन्त देवाः । तां विश्वरूपाः पशवो वदन्ति ।

सा नो मन्द्रेष मूर्जं दुहाना । धेनुर्वागस्मा-नुपसुष्टुतैतु । 64A

यद् वाग्वदन्त्य विचेतनानि । राष्ट्री देवानां निषसाद मन्द्रा ।

चतस्र ऊर्जं दुदुहे पयांसि । क्वस्वि दस्याः परमं जगाम ॥ 64B

The expansion 64a appearing in TB.2.4.6.10

The expansion 64b appearing in TB.2.4.6.11

TB 2.8.8.4 to TB 2.8.8.5 for Para 65,66

अनन्ता-मन्तादधि निर्मितां महीं । यस्यां देवा अदधुर् भोजनानि ।

एकाक्षरां द्विपदाञ् षट्पदाञ्च । वाचं देवा उपजीवन्ति विश्वे ।

वाचं देवा उपजीवन्ति विश्वे । वाचं गन्धर्वाः पशवो मनुष्याः ।

वाचीमा विश्वा भुवना-न्यर्पिता । सा नो हवं जुषता-मिन्द्र पत्नी ।

वागक्षरं प्रथमजा ऋतस्य । वेदानां माता-ऽमृतस्य नाभिः ॥ 65

सा नो जुषाणोप यज्ञ मागात् । अवन्ती देवी सुहवा मे अस्तु ।

या मृषयो मन्त्र कृतो मनीषिणः । अन्वैच्छन् देवा-स्तपसा श्रमेण ।

तां देवीं वाचञ् हविषा यजामहे । सा नो दधातु सुकृतस्य लोके ।

चत्वारि वाक् परिमिता पदानि । तानि विदुर् ब्राह्मणा ये मनीषिणः ।

गुहा त्रीणि निहिता नेङ्गयन्ति । तुरीयं वाचो मनुष्या वदन्ति ॥ 66

1.30 श्रद्धा सूक्तं

TB 2.8.8.5 to TB 2.8.8.8 for Para 67,68, 69a

श्रद्धया॑ऽग्नि॑ स्समि॒ध्यते॑ । श्रद्धया॑ वि॒न्दते॑ ह॒विः । श्रद्धां॑ भ॒गस्य॑ मूर्ध॒नि ।
वच॑सा वे॒दयाम॑सि । प्रि॒यः श्रद्धे॑ द॒दतः॑ । प्रि॒यः श्रद्धे॑ दि॒दासतः॑ ।
प्रि॒यं भो॒जेषु॑ यज्व॒सु । इ॒दं म॑ उ॒दितं॑ कृ॒धि ।
यथा॑ दे॒वा अ॒सुरेषु॑ । श्रद्धा॑ मु॒ग्रेषु॑ च॒क्रिरे॑ ॥ 67

ए॒वं भो॒जेषु॑ यज्व॒सु । अ॒स्माक॑-मु॒दितं॑ कृ॒धि । श्रद्धां॑ दे॒वा यज॑मानाः ।
वा॒यु-गो॒पा उपा॑सते । श्रद्धा॑ हृ॒दय्य॑या-ऽऽकू॒त्या । श्रद्धया॑ हू॒यते॑ ह॒विः ।
श्रद्धां॑ प्रा॒तर्, ह॒वामहे॑ । श्रद्धां॑ म॒द्ध्यन्दि॑नं परि ।
श्रद्धा॑ सूर्य॑स्य नि॒मृचि॑ । श्रद्धे॑ श्रद्धा॑प॒ये ह॒मा ॥ 68
श्रद्धा॑ दे॒वान-धि॑वस्ते । श्रद्धा॑ वि॒श्व मि॒दं जग॑त् ।
श्रद्धां॑ का॒मस्य॑ मा॒तरं॑ । ह॒विषा॑ वर्द्ध॒याम॑सि । 69A

1.31 ब्रह्म सूक्तं

TB 2.8.8.10 to TB 2.8.8.11 for Para 69b to 71

ब्रह्म॑ज॒ज्ञानं॑ प्रथ॒मं पु॒रस्ता॑त् । वि॒सी॒मत॑-स्सु॒रुचो॑ वे॒न आ॑वः ।
स बु॒द्धि॒नया॑ उ॒पमा॑ अ॒स्य वि॒ष्ठाः । स॒तश्च॑ यो॒नि-म॑स॒तश्च॑ वि॒वः ॥

पि॒ता-वि॒राजा मृ॒षभो-र॒यीणां । अ॒न्तरि॒क्षं वि॒श्वरू॒प आ॒विवेश ॥ 69B

तम॑कै॒रभ्य॑र्चन्ति व॒थ्सं । ब्र॒ह्म स॒न्तं ब्र॒ह्मणा॑ व॒र्द्धय॑न्तः ॥

ब्र॒ह्म दे॒वान॑जनयत् । ब्र॒ह्म वि॒श्वमि॒दं जग॑त् ॥

ब्र॒ह्मणः॑ क्ष॒त्रं निर्मि॑तं । ब्र॒ह्म ब्रा॒ह्मण॑ आ॒त्मना॑ ॥

अ॒न्तर॑स्मि-न्नि॒मे लो॒काः । अ॒न्त वि॒श्वमि॒दं जग॑त् ।

ब्र॒ह्मैव॑ भू॒तानां॑ ज्येष्ठं॑ । तेन॑ कोऽ॒र्हति॑ स्प॒र्द्धितुं॑ ॥ 70

ब्र॒ह्म दे॒वा-स्त्र॑यस्त्रि॒ंशत् । ब्र॒ह्म-न्नि॒न्द्र प्र॑जापती ।

ब्र॒ह्मन्-ह॑ वि॒श्वा भू॒तानि॑ । ना॒वी वा॒न्त-स्स॑माहिता ॥

च॒तस्र॑ आ॒शाः प्र॑चरन्त्व-ग्न॒यः । इ॒मन्नो॑ य॒ज्ञन्न॑यतु प्र॒जान॑न् ।

घृ॒तं पि॒न्वन् ज॒रं सु॒वीरं॑ । ब्र॒ह्म स॒मिद् भ॑वत्याहु॒तीनां॑ ॥ 71

1.32 गो सूक्तं

TB 2.8.8.11 to TB 2.8.8.11 for Para 72

आ॒गावो॑ अ॒गम॑न्नु॒त भ॒द्र-म॑क्रन् । सी॒दन्तु॑ गो॒ष्ठे-र॑णयन्त्व॒स्मे ॥

प्र॒जाव॑तीः पु॒रु रू॒पा इ॒ह स्युः॑ । इ॒न्द्राय॑ पूर्वी रु॒षसो॑ दु॒हानाः॑ ।

इ॒न्द्रो य॑ज्वने पृ॒णते॑ च शि॒क्षति॑ । उ॒पेद्द॑दाति न स्वं मु॒षाय॑ति ।

भू॒यो भू॒यो र॒यिमि॑दस्य व॒र्द्धय॑न् । अ॒भिन्ने॑ खि॒ल्ले नि॑दधाति दे॒वयुं॑ ।

न ता न॑श॒न्ति न ता अ॒र्वा ॥ 72

Below is the full text of the concised Mantra given in "italics" above.

This concised Mantra is formed by adding the First word/part from the first part of the First para , 2nd word /part from first part of Second para of Full Mantra which is given below. Add the Underlined words of the Full Mantra to arrive at the above concised Mantra. It is more appropriate to chant the full version as given below. Please refer to your Guru for any clarifications/explanations.

न ता न॑श॒न्ति नद॑भाति तस्करः ।
 नैना॑ अमि॒त्रो व्य॑थिरा दध॑र्षति ।
 देवा॑श्च याभि॒र् यज॑ते ददा॑ति च ।
 ज्यो॒गिता॑भि स्सच॑ते गोप॑ति स्सह ॥ 72A

न ता अ॒र्वा रेणु॑ कका॒टो अ॑श्नुते ।
 न स॑ च॒ स्कृ॑तत्र-मुप॑यन्ति ता अ॒भि ।
 उरु॑गायम॒भयं॑ तस्य॒ ता अनु॑ ।
 गावो॑ म॒र्त्यस्य॑ विच॑रन्ति यज्व॑नः । 72B

Both 72a and 72b appearing in T.B.2.4.6.9

TB 2.8.8.12 for Para 73 to 74

गावो॑ भ॒गो गाव॑ इन्द्रो॒ मे अ॑च्छात् । गाव॑ स्सोम॒स्य प्र॑थम॒स्य भ॑क्षः ।
 इ॒मा या गाव॑-स्सज॒नास॑ इन्द्रः । इ॒च्छामी॑-बृ॒दा मन॑सा-चिदिन्द्रं॑ ।
 यूयं॑ गावो॒ मेद॑यथा कृ॒शज्जि॑त् । अ॒श्ली॒लं चि॑त् कृ॒णु॒था सु॑प्रतीकं ॥ 73

भ॒द्रं गृ॒हं कृ॒णुथ॑ भ॒द्र वा॒चः । बृ॒हद्वो॑ व॒य उ॒च्यते॑ स॒भासु॑ ।
 प्र॒जाव॑ती स्सू॒यव॑सꣳ-रि॒शन्तीः॑ । शु॒द्धा अ॒प स्सु॑प्रपा॒णे पि॑बन्तीः ।
 मा॒व स्तेन॑ ई॒शत॑ माघशꣳसः । परि॒वो हे॒ती रु॒द्रस्य॑ वृ॒ज्यात् ।
 उ॒पेद॑-मु॒प-प॑र्चनं । आ॒सु गो॒षूप॑ पृ॒च्यतां॑ । उ॒पर्ष॑भ॒स्य रे॑तसि ।
 उ॒पेन्द्र॑ तव॒ वी॒र्ये ॥ 74 (24)

1.33 सूर्या चन्द्रमसा सूक्तं

TB 2.8.9.1 for Para 75 to 77

ता सूर्या चन्द्रमसा विश्व-भृ॒त्तमा॑ महत् । ते॒जो व॑सु॒मद्रा॑जतो दि॒वि ।
 सा॒मात्मा॑ना च॒रत॑ स्साम-चा॒रिणा॑ । य॒योर्व्र॑तं नम॒मे जा॑तु दे॒वयोः॑ ।
 उ॒भाव॑न्तौ परि॒यात॑ अ॒म्या । दि॒वो न र॑श्मीꣳ स्त॒नुतो॑-व्य॒र्णवे॑ ।
 उ॒भा भु॑वन्ती भु॒वना॑ क॒विक्र॑तू । सूर्या न चन्द्रा च॒रतो॑ ह॒ताम॑ती ।
 प॒तीद्यु॑मद् विश्व-वि॒दा उ॒भा दि॒वः । सूर्या उ॒भा च॒न्द्रम॑सा वि॒चक्ष॑णा ॥ 75

वि॒श्ववा॑रा व॒रिवो॑ भा व॒रेण्या॑ । ता नोऽव॑तं म॒तिम॑न्ता म॒हि॒व्रता॑ ।
 वि॒श्वव॑परी प्र॒तर॑णा त॒रन्ता॑ । सु॒वर्वि॑दा दृ॒शये॑ भूरि र॑श्मी ।
 सूर्या हि चन्द्रा व॒सुत्वेष॑-दर्श॒ता । म॒नस्वि॑नो ऽभानु॑च॒रतो॑नु-सं॒दिवं॑ ।
 अ॒स्य श्र॑वो न॒द्य स्स॑प्त बिभ्र॒ति । द्या॒वा क्षा॑मा पृ॒थि॒वी दर्श॑तं व॒पुः ।
 अ॒स्मे सूर्या च॒न्द्रम॑सा-ऽभि॒चक्षे॑ । श्र॒द्धेक॑-मिन्द्र च॒रतो॑ वि॒चर्तु॑रं ॥ 76

पूर्वापरं चरतो माय यैतौ । शिशू क्रीडन्तौ परियातो अध्वरं ।

विश्वान्यन्यो भुवना ऽभिचष्टे । ऋतूनन्यो विदधज्जायते पुनः ।

हिरण्यवर्णाः शुचयः पावका यासां राजा ।

यासां देवा शिवेन मा चक्षुषा पश्यत ।

आपो भद्रा आदित्यश्यामि । 77

Below is the full text of the concised Mantra given in "italics" above.
This concised Mantra is formed by adding the First word/part from the first part of the First para , 2nd word /part from first part of Second para and so on. Add the Underlined words of the Full Mantra to arrive at the above concised Mantra. It is more appropriate to chant the full version as given below. Please refer to your Guru for any clarifications/explanations.

हिरण्यवर्णाः शुचयः पावका यासु जातः कश्यपो यास्विन्द्रः ।

अग्नियाँ गर्भं दधिरे विरूपास्ता न आपश्शः स्योना भवन्तु ॥

यासां राजा वरुणो याति मध्ये सत्यानृते अवपश्यं जनानां ।

मधुश्चुत-श्शुचयो याः पावकास्ता न आपश्शः स्योना भवन्तु ॥ 77A

यासां देवा दिवि कृण्वन्ति भक्षय्या अन्तरिक्षे बहुधा भवन्ति ।

याः पृथिवीं पयसोन्दन्ति शुक्रास्ता न आपश्शः स्योना भवन्तु ॥

शिवेन मा चक्षुषा पश्यताप शिवया तनुवोप स्पृशत त्वचं मे ।

सर्वाः अग्नीः रप्सुषदो हुवे वो मयि वर्चो बलमोजो निधत्त ॥ 77B

आपो भद्रा घृतमिदाप आसु रग्नीषो मौ बिभ्रत्याप इत्ताः ।

तीव्रो रसो मधुप्रचा-मरङ्गम आमा प्राणेन सहवर्च सागन् ।

आदित्यश्या म्युतवा श्णोम्यामा घोषो गच्छति वाङ्म आसां ।

मन्ये भेजानो अमृतस्य तर्हि हिरण्यवर्णा अतृपं यदा वः ॥ 77C

Expansion 77a appearing in TS 5.6.1.1

Expansion 77b appearing in TS 5.6.1.2

Expansion 77c appearing in TS.5.6.1.4

1.34 नासदासीय सूक्तं

TB 2.8.9.3 to TB 2.8.9.7 for Para 78 to 81

नासदासीन्नो सदासीत्तदानीं । नासीद्रजो नो व्योमा-परोयत् ।

किमा वरीवः कुहकस्य शर्मन् । अभंः किमासीद्-गहनं गभीरं ॥ 78

न मृत्यु-रमृतं तर्हि न । रात्रिया अह आसीत् प्रकेतः ।

आनीद वातः स्वधया तदेकं । तस्माद्धान्यन् न परः किंचनास ।

तम आसी-त्तमसा गूढमग्रे प्रकेतं । सलिलः सर्व मा इदं ।

तुच्छे नाभवपिहितं यदासीत् । तमसस् तन्महिना जायतैकं ।

कामस्तदग्रे समवर्त्तताधि । मनसो रेतः प्रथमं यदासीत् ॥ 79

स तो बन्धुमसति निरविन्दन् । हृदि-प्रतीष्या कवयो मनीषा ।

तिरश्चीनो विततो रश्मि-रेषां । अधस्विदासी(3) दुपरिस्विदासी(3)त् ।

रेतोधा आसन् महिमान आसन् । स्वधा अवस्तात् प्रयतिः परस्तात् ।

को अ॒ब्धा वे॒दक इ॒ह प्र॒वोच॑त् । कु॒त आ॒जाता कु॒त इ॒यं वि॑सृष्टिः ।
अ॒र्वाग् दे॒वा अ॒स्य वि॒सर्ज॑नाय । अ॒था को वे॒द यत॑ आ ब॒भूव॑ ॥ 80

इ॒यं वि॑सृष्टिर् यत॑ आब॒भूव॑ । यदि॑ वा द॒धे यदि॑ वा न ।
यो अ॒स्याद्ध्यक्षः॑ प॒रमे व्यो॑मन् । सो अ॒ङ्गवे॑द यदि॑ वा न वे॒द ।
किञ्चि॑त्स्वि॒द्वनं॑ क उ॒स वृ॒क्ष आ॑सीत् । यतो॑ द्यावापृथि॒वी नि॑ष्टतक्षुः ।
मनी॑षिणो॒ मनसा॑ पृ॒च्छते॑दुतत् । यद॒ध्यति॑ष्ठद् भुव॒नानि॑ धारयन् ।
ब्र॒ह्मव॑नं ब्र॒ह्म स वृ॒क्ष आ॑सीत् । यतो॑ द्यावापृथि॒वी नि॑ष्टतक्षुः ॥
मनी॑षिणो॒ मनसा॑ वि॒ब्रवी॑मि वः । ब्र॒ह्माद्ध्यति॑ष्ठद् भुव॒नानि॑ धारयन् ॥ 81

1.35 भाग्य सूक्तं

TB 2.8.9.7 to TB 2.8.9.9 for Para 82 to 84

प्रा॒तरग्निं॑ प्रा॒तरिन्द्र॑ हवामहे । प्रा॒तर् मि॒त्रा व॑रुणा प्रा॒तरश्चि॑ना ॥
प्रा॒तर् भ॒गं पू॒षणं॑ ब्र॒ह्मण॑स्पतिं । प्रा॒तस्सोम॑ मु॒त रु॒द्र हु॒वेम॑ ॥
प्र॒तर्जितं॑ भ॒गमु॒ग्र हु॒वेम॑ । व॒यं पु॒त्रम॑दि॒तेर्यो वि॑ध॒र्ता ।
आ॒ध्रश्चि॒द्वं म॑न्यमान-स्तु॒रश्चि॑त् । रा॒जा चि॒द्वं भ॒गं भ॑क्षीत्याह ॥ 82

भ॒गप्र॑णे॒तर्-भ॒गस॑त्य॒राधः॑ । भ॒गेमां धि॑यमु॒दव द॑दन्नः ।
भ॒गप्र॑णो॒ जन॑य गो॒भिरश्वैः॑ । भ॒ग प्र॑नृभिर् नृ॒वन्त॑स्स्याम ॥

उ॒ते॒दा॒नीं॑ भ॒गव॑न्तस्स्याम । उ॒त प्र॑पित्व उ॒त म॑द्ध्ये अ॒ह्नां॑ ।
 उ॒तो॒दि॒ता म॑घव॒न्त्-सूर्य॑स्य । व॒यं दे॒वाना॑ सु॒मतौ॑ स्याम ॥
 भ॒ग ए॒व भ॒गवा॑ अस्तु दे॒वाः । ते॒न व॒यं भ॒गव॑न्त स्स्याम । 83

त॒न्त्वा भ॒ग सर्व॑ इ॒ज्जो॑हवीमि । स॒नो भ॒ग पु॒र ए॒ता भ॑वेह ॥
 स॒म॒ध्व॒रा-यो॑षसोऽन॒मन्त॑ । द॒धि॒क्रा॒वे॒व शु॒चये॑ प॒दाय॑ ।
 अ॒र्वा॒ची॒नं व॑सु॒विदं॑ भ॒गन्नः॑ । र॒थमि॑वा॒श्वा वा॒जिन॑ आव॒हन्तु॑ ॥
 अ॒श्वा॒व॒तीर् गो॑म॒तीर् न॑ उ॒षा॒सः । वी॒र॒व॒ती-स्स॒दमु॑च्छन्तु भ॒द्राः ।
 घृ॒तं दु॒हा॒ना वि॒श्वतः॑ प्र॒पी॒नाः । यू॒यं पा॒त स्व॒स्तिभि॑-स्स॒दानः॑ ॥ 84 (25)

1.36 नक्षत्र सूक्तं(वाक्यं)

T.B.3.1.1.1 to T.B.3.1.3.3, for para 85 to 112

1.नक्षत्रं – कृत्तिका देवता – अग्निः

अ॒ग्नि॒र्नः॑ पा॒तु कृ॒त्ति॒काः॑ । नक्ष॑त्रं दे॒वमि॑न्द्रि॒यं । इ॒दमा॑सां-वि॒चक्ष॑णं ।
ह॒वि॒रा॒सन् जु॑होत॒न । यस्य॑ भा॒न्ति र॑श्मयो यस्य॑ के॒तवः॑ ।
यस्ये॒मा वि॒श्वा भु॑वनानि सर्वा । स कृ॒त्ति॒का भि॒रभि-स॑म्व॒सानः॑ ।
अ॒ग्नि॒र्नो दे॒वस्सु॑वि॒ते द॑धातु ॥ 1

2. नक्षत्रं – रोहिणी देवता – प्रजापतिः

प्र॒जा॒प॒ते रो॒हि॒णी वे॒तु प॒त्नी । वि॒श्वरू॑पा बृ॒हती चि॒त्रभा॑नुः । 85
सा नो॑ य॒ज्ञस्य॑ सु॒वि॒ते द॑धातु । यथा जी॒वेम॑ श॒रद॑स्स॒वीराः॑ ।
रो॒हि॒णी दे॒व्युद॑गात् पु॒रस्ता॑त् । वि॒श्वा रू॒पाणि॑ प्र॒तिमो॑द॒माना ।
प्र॒जा॒प॒तिꣳ ह॒विषा॑ वर्धयन्ती । प्रि॒या दे॒वाना॑-मु॒पया॑तु य॒ज्ञं ॥ 2

3.नक्षत्रं – मृगशीर्षः देवता – सोमः

सो॒मो रा॒जा मृ॒गशी॑र्षेण आ॒गन् । शि॒वं नक्ष॑त्रं प्रि॒यम॑स्य॒ धाम॑ ।
आ॒प्याय॑मानो बहु॒धा जने॑षु । रे॒तः प्र॒जां य॑ज॒माने॑ द॒धातु॑ । 86
य॒त्ते नक्ष॑त्रं मृ॒गशी॑र्षमस्ति । प्रि॒यꣳ रा॒जन् प्रि॒यत॑मं प्रि॒याणां॑ ।
तस्मै॑ ते सोम॒ ह॒विषा॑ वि॒धेम॑ । श॒न्न ए॒धि द्वि॒पदे॑ शंचतु॒ष्पदे॑ ॥ 3

4. नक्षत्रं – आर्द्रा

देवता – रुद्रः

आ॒र्द्रा॒या रु॒द्रः प्र॒थ॒मा न ए॒ति । श्रे॒ष्ठो दे॒वानां॑ प॒तिर॒घ्निया॑नां॑ ।
 नक्ष॑त्रमस्य ह॒विषा॑ वि॒धेम । मा नः॑ प्र॒जाꣳ री॒रिष॑न् मोत वी॒रान् ।
 हे॒ती रु॒द्रस्य॑ परि॒णो वृ॑णक्तु । आ॒र्द्रा नक्ष॑त्रं जुष॒ताꣳ ह॒विर्नः॑ । 87
 प्र॒मुञ्च॑मानौ दु॒रितानि॑ वि॒श्वा । अ॒पाघ॑शꣳ सन्नु॒-द॒ताम॑रातिं ॥ 4

5. नक्षत्रं – पुनर्वसु

देवता – अदितिः

पुन॑र्नो दे॒व्यदि॑तिः स्पृ॒णोतु॑ । पुन॑र्वसू नः पुन॑रेतां॑ य॒ज्ञं ।
 पुन॑र्नो दे॒वा अभि॑यन्तु॒ सर्वे॑ । पुनः॑ पुन॑र्वो ह॒विषा॑ य॒जामः॑ ।
 ए॒वा न दे॒व्यदि॑तिरन॒र्वा । वि॒श्वस्य॑ भ॒र्त्री ज॑गतः प्र॒तिष्ठा ।
 पुन॑र्वसू ह॒विषा॑ वर्ध॑यन्ती । प्रि॒यं दे॒वाना॑-म॒प्येतु॑ पाथः ॥ 5 (88)

6. नक्षत्रं – पुष्यः

देवता – बृहस्पतिः

बृ॒हस्प॑तिः प्र॒थम॑ञ्जायमानः । ति॒ष्यं नक्ष॑त्रम॒भि सं॑ब॒भूव ।
 श्रे॒ष्ठो दे॒वानां॑ पृ॒तना॑सु जि॒ष्णुः । दि॒शो नु॑ सर्वा अभि॑यन्नो अस्तु ।
 ति॒ष्यः पु॒रस्ता॑दु॒त म॑ध्यतो नः । बृ॒हस्प॑तिर् नः परि॑पातु प॒श्चात् ।
 बा॒धे तान् द्वे॒षो अभि॑यं कृ॒णुतां॑ । सु॒वीर्य॑स्य प॒तय॑स्याम ॥ 6

7. नक्षत्रं – आश्लेषं

देवता – सर्पः

इ॒दꣳ स॒र्पेभ्यो॑ ह॒विर॑स्तु जु॒ष्टं । आ॒श्लेषा॑ येषा॑ म॒नुय॑न्ति चे॒तः । 89
 ये अ॒न्तरि॑क्षं पृथि॒वी-क्षि॑यन्ति । तेन॑ स्स॒र्पासो॑ ह॒वमा॑गमि॒ष्ठाः ।

ये रोचने सूर्यस्यापि सर्पाः । ये दिवं देवी-मनुसञ्चरन्ति ।
 येषामाश्रेषा अनुयन्ति कामं । तेभ्य-स्सर्पेभ्यो मधु-मज्जुहोमि ॥ 7

8.नक्षत्रं - मघा देवता - पितरः

उपहूताः पितरो ये मघासु । मनोजवस-स्सुकृत-स्सुकृत्याः ।
 ते नो नक्षत्रे हवमागमिष्ठाः । स्वधाभिर् यज्ञं प्रयतं जुषन्तां । 90
 ये अग्निदग्धा येऽनग्नि-दग्धाः । येऽमुँलोकं पितरः क्षियन्ति ।
 याँश्च विद्मयाँ उ च न प्रविद्म । मघासु यज्ञँ सुकृतं जुषन्तां ॥ 8

9.नक्षत्रं - पूर्वफल्गुनी देवता - अर्यमा

गवां पतिः फल्गुनी-नामसि त्वं । तदर्यमन् वरुण मित्र चारु ।
 तत्त्वा वयँ सनितारँ सनीनां । जीवा जीवन्तमुप सम्विशेम ।
 येनेमा विश्वा भुवनानि सज्जिता । यस्य देवा अनुसँय्यन्ति चेतः । 91
 अर्यमा राजाऽजरस्तु विष्मान् । फल्गुनीना-मृषभो रोरवीति ॥ 9

10.नक्षत्रं - उत्तर फल्गुनी देवता - भगः

श्रेष्ठो देवानां भगवो भगासि । तत्त्वा विदुः फल्गुनी-स्तस्य वित्तात् ।
 अस्मभ्यं-क्षत्रमजरँ सुवीर्यं । गोमदश्च-वदुपसन्नु-देह ।
 भगोह दाता भग इत्प्रदाता । भगो देवीः फल्गुनी-राविवेश ।
 भगस्येत्तं प्रसवं गमेम । यत्र देवै-स्सधमादं मदेम । ॥ 10/ 92

11. नक्षत्रं – हस्तः

देवता – सवित

आ॒या॒तु दे॒व-स्स॒वि॒तो प॒या॒तु । हि॒र॒ण्य॒येन॑ सु॒वृ॒ता र॒थेन॑ ।
 व॒हन॒ हस्त॑ सु॒भ॒गं वि॒द्व॒नाप॒सं । प्र॒य॒च्छ॒न्तं प॒पु॒रिं पु॒ण्य॒म॒च्छ॑ ।
 हस्तः॑ प्र॒य॒च्छ॒ त्वमृ॑तं व॒सी॒यः । दक्षि॑णेन प्र॒ति॒गृ॒भ्णी॒म ए॒नत् ।
 दा॒ता॒र-म॒द्य स॒वि॒ता वि॒दे॒य । यो नो॑ ह॒स्ता॒य प्र॒सु॒वा॒ति य॒ज्ञं ॥ 11

12. नक्षत्रं – चित्रा

देवता – त्वष्टा

त्व॒ष्टा नक्ष॑त्र-म॒भ्ये॒ति चि॒त्रां । सु॒भ॒ सु॒सं-यु॒व॒ति रो॒च॒मा॒नां । 93
 नि॒वे॒श॒य॒न्न-मृ॒ता॒न् म॒र्त्याश्च॑ । रू॒पा॒णि पि॒श॒न् भु॒व॒ना॒नि वि॒श्वा॑ ।
 तन्न॑स्त्वष्टा तदु॒ चि॒त्रा वि॒च॒ष्टां । तन्नक्ष॑त्रं भू॒रि॒दा अ॒स्तु म॒ह्यं ।
 तन्नः॑ प्र॒जां वी॒र॒व॒ती स॒नो॒तु । गो॒भि॒र्नो अ॒श्वै-स्स॒म॒न॒क्तु य॒ज्ञं ॥ 12

13. नक्षत्रं – स्वाती

देवता – वायुः

वा॒युर् नक्ष॑त्र-म॒भ्ये॒ति नि॒ष्ट्यां॑ । ति॒ग्म॒शृ॒ङ्गो वृ॒ष॒भो रो॒रु॒वा॒णः ।
 स॒मी॒र॒य॒न् भु॒व॒ना मा॒तरि॑श्वा । अ॒प॒ द्वे॒षा॒सि नु॒द॒ता॒म॒रा॒तीः । 94
 तन्नो॑ वा॒य॒स्तदु॒ नि॒ष्ट्या श्रृ॒णो॒तु । तन्नक्ष॑त्रं भू॒रि॒दा अ॒स्तु म॒ह्यं ।
 तन्नो॑ दे॒वा॒सो अ॒नु जा॒न॒न्तु का॒मं॑ । य॒था तरे॑म॒ दु॒रि॒ता॒नि वि॒श्वा॑ ॥ 13

14. नक्षत्रं – विशाखा

देवता – इन्द्राग्नीः

दू॒र-म॒स्म॒च्छ॒त्र॒वो य॒न्तु भी॒ताः । तदि॒न्द्रा॒ग्नी कृ॒णु॒तां तद् वि॒शा॒खे ।
 तन्नो॑ दे॒वा अ॒नु॒म॒द॒न्तु य॒ज्ञं । प॒श्चा॒त् पु॒र॒स्ता-द॒भ॒य॒न्नो अ॒स्तु ।

नक्षत्राणा-मधिपत्नी विशाखे । श्रेष्ठा-विन्द्राग्नी भुवनस्य गोपौ । 95

विषूच-शत्रूनपबाधमानौ । अपक्षुध-नुदतामरातिं । ॥ 14

15. पौर्णमासि

पूर्णा पश्चादुत पूर्णा पुरस्तात् । उन्मध्यतः पौर्णमासी जिगाय ।

तस्यां देवा अधि सम्वसन्तः । उत्तमे नाक इह मादयन्तां ।

पृथ्वी सुवर्चा युवति-स्सजोषाः । पौर्णमास्युदगा-च्छोभमाना ।

आप्याय-यन्ती दुरितानि विश्वा । उरुं दुहां यँजमानाय यज्ञं ॥ 15/96

(26)

16. नक्षत्रं – अनूराधा

देवता – मित्रः

ऋद्ध्यास्म हव्यैर् नमसोपसद्य । मित्रं देवं मित्रधेयन्नो अस्तु ।

अनूराधान् हविषा वर्द्धयन्तः । शतं जीवेम शरदस्सवीराः ।

चित्रं-नक्षत्र-मुदगात् पुरस्तात् । अनूराधास इति यद् वदन्ति ।

तन्मित्र एति पथिभिर् देवयानैः । हिरण्ययैर् विततै-रन्तरिक्षे ॥ 16

17. नक्षत्रं – ज्येष्ठा

देवता – इन्द्रः

इन्द्रो ज्येष्ठा मनु नक्षत्रमेति । यस्मिन् वृत्रं वृत्र तूर्यं ततार । 97

तस्मिन् वय-ममृतं दुहानाः । क्षुधन्तरेम दुरितिं दुरिष्टिं ।

पुरन्दराय वृषभाय धृष्णावे । अषाढाय सहमानाय मीढुषे ।

इन्द्राय ज्येष्ठा मधुमद्दुहाना । उरुं कृणोतु यजमानाय लोकं ॥ 17

18.नक्षत्रं – मूलं

देवता – प्रजापतिः

मूलं प्रजां वीरवतीं विदेय । पराच्येतु निर्ऋतिः पराचा ।
 गोभिर् नक्षत्रं पशुभिस्समक्तं । अहर् भूयाद् यजमानाय मह्यं । 98
 अहर्नो अद्य सुविते दधातु । मूलं नक्षत्रमिति यद् वदन्ति ।
 पराचीं वाचा निर्ऋतिं नुदामि । शिवं प्रजायै शिवमस्तु मह्यं ॥ 18

19.नक्षत्रं – पूर्वाषाढा

देवता – आपः

या दिव्या आपः पयसा संबभूवुः । या अन्तरिक्ष उत पार्थिवीर्याः ।
 यासामषाढा अनुयन्ति कामं । ता न आपः शः स्योना भवन्तु ।
 याश्च कूप्या याश्च नाद्यास्समुद्रियाः । याश्च वैशन्तीरुत प्रासचीर्याः । 99
 यासामषाढा मधु भक्षयन्ति । ता न आपः शः स्योना भवन्तु ॥ 19

20.नक्षत्रं – उत्तराषाढा

देवता – विश्वेदेवः

तन्नो विश्वे उप शृण्वन्तु देवाः । तदषाढा अभि सम्यन्तु यज्ञं ।
 तन्नक्षत्रं प्रथतां पशुभ्यः । कृषिर् वृष्टिर् यजमानाय कल्पतां ।
 शुभ्राः कन्या युवतयस्सुपेशसः । कर्मकृतस्सुकृतो वीर्यावतीः ।
 विश्वान् देवान् हविषा वर्द्धयन्तीः । अषाढाः काम मुपयान्तु यज्ञं ॥

20/100

21.नक्षत्रं – अभिजिद्

देवता – ब्रह्मा

यस्मिन् ब्रह्माऽभ्यजयत् सर्वमेतत् । अमुञ्च लोक मिदमूच सर्वं॥
 तन्नो नक्षत्र-मभिजिद् विजित्य । श्रियं दधात्वहणीयमानं ।
 उभौ लोकौ ब्रह्मणा सज्जितेमौ । तन्नो नक्षत्र-मभिजिद् विचष्टां ।
 तस्मिन् वयं पृतना स्संजयेम । तन्नो देवासो अनुजानन्तु कामं॥ 21

22.नक्षत्रं – श्रवणं

देवता – विष्णुः

शृण्वन्ति श्रोणा-ममृतस्य गोपां । पुण्यामस्या उपशृणोमि वाचं॥ 101
 महीं देवीं विष्णुपत्नी मजूर्या । प्रतीची मेनाञ् हविषा यजामः ।
 त्रेधा विष्णु-रुरुगायो विचक्रमे । महीं दिवं पृथिवी-मन्तरिक्षं ।
 तच्छ्रोणैति श्रव-इच्छमाना । पुण्यञ् श्लोकं यजमानाय कृण्वती॥ 22

23.नक्षत्रं – श्रविष्ठा

देवता – वसवः

अष्टौ देवा वसवस्सोम्यासः । चतस्रो देवी रजराः श्रविष्ठाः ।
 ते यज्ञं पान्तु रजसः परस्तात् । सम्वत्सरीण-ममृतञ् स्वस्ति॥ 102
 यज्ञं नः पान्तु वसवः पुरस्तात् । दक्षिणतो-ऽभियन्तु श्रविष्ठाः ।
 पुण्यन्नक्षत्रमभि सम्विशाम । मा नो अराति-रघशञ् सागन्तु॥ 23

24.नक्षत्रं – शतभिषक्

देवता – वरुणः

क्षत्रस्य राजा वरुणोऽधिराजः । नक्षत्राणां शतभिषग् वसिष्ठः ।
 तौ देवेभ्यः कृणुतो दीर्घमायुः । शतं सहस्रा भेषजानि धत्तः ।
 यज्ञन्नो राजा वरुण उपयातु । तन्नो विश्वे अभिसम्यन्तु देवाः । 103
 तन्नो नक्षत्रं शतभिषग् जुषाणं । दीर्घमायुः प्रतिरद् भेषजानि ॥ 24

25.नक्षत्रं – पूर्वप्रोष्ठपदा

देवता – अजयेकपादः

अज एकपाद-दुदगात् पुरस्तात् । विश्वा भूतानि प्रति मोदमानः ।
 तस्य देवाः प्रसवं यन्ति सर्वे । प्रोष्ठपदासो अमृतस्य गोपाः ।
 विभ्राजमान-स्समिधान उग्रः । आन्तरिक्ष-मरुहद-गन्धां ।
 तं सूर्यं देव-मजमेकपादं । प्रोष्ठपदासो अनुयन्ति सर्वे ॥ 25 / 104

26.नक्षत्रं – उत्तरप्रोष्ठपदा

देवता – अहिर्बुद्धिधनयः

अहिर्बुद्धिधनयः प्रथमान एति । श्रेष्ठो देवानामुत मानुषाणां ।
 तं ब्राह्मणा-स्सोमपा-स्सोम्यासः । प्रोष्ठपदासो अभिरक्षन्ति सर्वे ।
 चत्वार एकमभि कर्म देवाः । प्रोष्ठपदास इति यान् वदन्ति ।
 ते बुद्धिनियं परिषद्यं स्तुवन्तः । अहिं रक्षन्ति नमसोपसद्य ॥ 26

27.नक्षत्रं – रेवती

देवता – पूषा

पू॒षा रे॒वत्य॑न्वे॒ति प॑न्थां॑ । पु॒ष्टि॒पती॑ प॒शुपा॑ वाज॑ब॒स्त्यौ । 105

इ॒मानि॑ ह॒व्या प्र॑य॒ता जु॑षाणा । सु॒गैर्नो॑ या॒नैरु॑प॒यातां॑ य॒ज्ञं ।

क्षु॒द्रान् प॒शून् र॑क्षतु रे॒वती॑ नः । गा॒वो नो॑ अ॒श्वाँ अ॒न्वे॒तु पू॒षा ।

अ॒न्नँ र॑क्षन्तौ ब॒हुधा॑ वि॒रूपं॑ । वा॒जँ स॑नु॒तां य॑ज॒मानाय॑ य॒ज्ञं ॥ 27

28 नक्षत्रं – अश्विनी

देवता – अश्विनी देव

तद॑श्वि॒ना-व॑श्च॒युजो॑प॒यातां॑ । शु॒भङ्ग॑मि॒ष्टौ सु॑य॒मेभि॑र॒श्वैः ।

स्व॒न्नक्ष॑त्रँ ह॒विषा॑ यजन्तौ । म॒ध्वा संपृ॑क्तौ य॒जुषा॑ स॒मक्तौ॑ । 106

यौ दे॒वानां॑ भि॒षजौ॑ ह॒व्यवा॑हौ । वि॒श्वस्य॑ दू॒ता-व॑मृ॒तस्य॑ गो॒पौ ।

तौ नक्ष॑त्रं-जु॒जुषा॑णो-प॒यातां॑ । न॒मोऽश्वि॑भ्यां कृ॒णु॒मो-ऽश्च॑युग्भ्यां॑ ॥ 28

29.नक्षत्रं – अपभरणी

देवता – यमः

अप॑ पा॒प्मानं॑ भ॒रणी॑र् भ॒रन्तु॑ । तद् य॒मो रा॒जा भ॑ग॒वान् वि॑च॒ष्टां ।

लो॒कस्य॑ रा॒जा म॑हतो म॒हान् हि॑ । सु॒गन्नः॑ प॒न्थाम॑भयं कृ॒णोतु॑ ।

यस्मिन्॑ नक्ष॒त्रे य॑म ए॒ति रा॒जा । यस्मि॑न्ने॒न-म॑भ्य॒षिंच॑न्त दे॒वाः ।

तद॑स्य चि॒त्रँ ह॒विषा॑ य॒जाम॑ । अप॑ पा॒प्मानं॑ भ॒रणी॑र् भ॒रन्तु॑ ॥ 29

30.अमावासि

निवेशनी॑ यत्ते॑ दे॒वा अ॒दधुः॑ ।

Below is the full text of the concised Mantra given in “italics” above.

This concised Mantra is formed by adding the First word/part from the first part of the First para , 2nd word /part from first part of Second para of Full Mantra which is given below. Add the Underlined words of the Full Mantra to arrive at the above concised Mantra. It is more appropriate to chant the full version as given below. Please refer to your Guru for any clarifications/explanations.

निवेशनी॑ सङ्गमनी॑ वसूनां॑ विश्वा॑ रूपाणि॑ वसू॒न्या-वेशय॑न्ती ।
 सहस्रपोष॑ सुभगा॑ रराणा॑ सा न आगन् वर्चसा॑ सम॑विदाना ।
 यत्ते॑ दे॒वा अ॒दधुर् भाग॑धेय-ममा॑वास्ये सम॑वसन्तो महि॒त्वा ।
 सा नो यज्ञं॑ पिपृ॒हि विश्व॑वारे रयि॒त्रो धेहि॑ सुभगे॑ सु॒वीरं॑ ॥ 30/107 (27)
 This Expansion is appearing in TS 3.5.1.1

31.चन्द्रमा

नवो॑ नवो॑ भवति॑ जायमानो॑ यमा॑दित्या अ॒शुमा॑-प्याय॑यन्ति ।

Below is the full text of the concised Mantra given in “italics” above.

This concised Mantra is formed by adding the First word/part from the first part of the First para , 2nd word /part from first part of Second para of Full Mantra which is given below. Add the Underlined words of the Full Mantra to arrive at the above concised Mantra. It is more appropriate to chant the full version as given below. Please refer to your Guru for any clarifications/explanations.

न॒वो॑ न॒वो॑ भ॒वति॑ जा॒यमा॑नाऽ॒ह्नां॑ के॒तु-रु॒षसा॑ मे॒त्य॒ग्रे॑ ।
 भा॒गं दे॒वेभ्यो॑ वि॒दधा॑त्यायन् प्र॒चन्द्र॑मास्तिरति दी॒र्घमा॑युः ।
 य॒मादि॒त्या अ॒शुमा॑प्याय॒यन्ति॑ य॒मक्षि॑त-म॒क्षित॑यः पि॒बन्ति॑ ।
 तेन॑ नो रा॒जा वरु॑णो बृ॒हस्प॑ति रा॒प्याय॑यन्तु भु॒वन॑स्य गो॒पाः ।
 This Expansion is appearing in TS 2.4.14.1

32. अ॒हो रा॒त्र

ये वि॒रूपे॑ स॒मन॑सा स॒म्व्य॑यन्ती । स॒मानं॑ त॒न्तुं परि॑ता-त॒नाते॑ ।
 वि॒भू प्र॒भू अ॒नुभू॑ वि॒श्वतो॑ हु॒वे । ते नो॑ नक्ष॒त्रे ह॒वमा॑गमे॒तं ।
 व॒यं दे॒वी ब्र॒ह्मणा॑ स॒म्वि॑दा॒नाः । सु॒रत्ना॑सो दे॒ववी॑तिं द॒धानाः॑ । 108
 अ॒होरा॑त्रे ह॒विषा॑ व॒र्द्धय॑न्तः । अ॒ति पा॑प्मान-म॒तिमु॑क्त्या ग॒मेम॑ ॥

33. उ॒षा

प्र॒त्युव॑ दृ॒श्याय॑ती । व्यु॒च्छन्ती॑ दु॒हिता॑ दि॒वः ।
 अ॒पो म॒ही वृ॑णुते चक्षु॒षा । त॒मो ज्यो॑तिष्-कृ॒णोति॑ सू॒नरी॑ ।
 उ॒दु स्त्रि॑यास्स॒चते॑ सू॒र्यः । स चा॑ उ॒द्यन्न॑क्ष॒त्र म॒र्चि॒मत् ।
 त॒वे दु॒षो व्यु॑षि सू॒र्यस्य॑ च । सं॒भक्ते॑न ग॒मेम॑हि ॥ 109

34. नक्षत्रः

तन्नो नक्षत्र मर्चिमत् । भानुमत्तेज उच्छरत् ।
 उप यज्ञमिहागमत् । प्रनक्षत्राय देवाय । इन्द्रायेन्दुं हवामहे ।
 स न स्सविता सुवथ् सनिं । पुष्टिदां वीरवत्तमं ॥

35. सूर्यः

उदुत्यं चित्रं ॥

Below is the full text of the concised Mantra given in “italics” above.
 This concised Mantra is formed by adding the First word/part from the first part of the First para , 2nd word /part from first part of Second para of Full Mantra which is given below. Add the Underlined words of the Full Mantra to arrive at the above concised Mantra. It is more appropriate to chant the full version as given below. Please refer to your Guru for any clarifications/explanations.

उदुत्यं जातवेदसं देवं वहन्ति केतवः । दृशे विश्वाय सूर्यं ।
 चित्रं देवाना मुदगादनीकं चक्षुर् मित्रस्य वरुणस्याग्नेः । 110
 आप्रा द्यावापृथिवी अन्तरिक्ष सूर्य आत्मा जगतस्तस्थुषश्च ॥

This Expansion is appearing in T.S.1.4.43.1

36. अदितिः

अदितिर्न उरुष्यतु महीमूषु मातरं ॥

Below is the full text of the concised Mantra given in “italics” above.
See notes above.

अदितिर्न उरुष्य-त्वदितिः शर्म यच्छतु । अदितिः पात्व॑ हसः ॥
महीमूषु मातरं सुव्रताना-मृतस्य पत्नी मवसे हुवेम ।
तुविक्षत्रा-मजरन्ती मरूची॑ सुशर्माण-मदिति॑ सुप्रणीतिं ॥
This Expansion is appearing in T.S.1.5.11.5

37. विष्णुः

इदं विष्णु प्रतद्विष्णुः ॥

Below is the full text of the concised Mantra given in “italics” above.
See notes above.

इदं विष्णुर् विचक्रमे त्रेधा निदधे पदं । समूढमस्य पा॑ सुरे ॥
प्रतद्विष्णु स्तवते वीर्याय । मृगो न भीमः कुचरो गिरिष्ठाः ।
यस्योरुषु त्रिषु विक्रमणेषु । अधिक्षियन्ति भुवनानि विश्वा ॥ 111
This Expansion is appearing in TS 1.2.13.1
This Expansion is appearing in TB 2.4.3.4

38. अग्निः

अग्नि॑र् मूर्धा॑ भुवः॑ ॥

Below is the full text of the concised Mantra given in “italics” above. See notes above

अग्नि॑र् मूर्धा॑ दि॒वः क॒कुत्प॑तिः पृ॒थि॒व्या अ॒यं ।
 अ॒पाꣳ रेताꣳ॑सि जि॒न्वति॑ ॥
 भु॒वा य॒ज्ञस्य॑ रज॒सश्च॑ ने॒ता यत्रा॑ नि॒युद्धिः॑ सच॑से शि॒वाभिः॑ ।
 दि॒वि मूर्धा॑नं दधि॒षे सुव॑र्षां जि॒ह्वा॒मग्ने॑ च॒कृषे॑ ह॒व्यवा॑हं ॥
 This Expansion is appearing in T.S.4.4.4.1

39. अनुमती

अनु॑नो-ऽद्या॑नुमति-रन्वि॑दनुमते॒ त्वं ॥

Below is the full text of the concised Mantra given in “italics” above. See notes above

अनु॑नोऽद्या॑नुमति॒ र्यज्ञं॑ दे॒वेषु॑ म॒न्यतां॑ ।
 अ॒ग्निश्च॑ ह॒व्यवा॑हनो भ॒वतां॑ दा॒शुषे॑ म॒यः ।
 अन्वि॑दनुमते॒ त्वं म॒न्यासै॑ शं॒च नः॑ कृ॒धि ।
 क्र॒त्वे दक्षाय॑ नो हि॒नु प्र॑ण आ॒यूꣳषि॑ ता॒रिषः॑ ।
 This Expansion is appearing in TS 3.3.11.3

40. हव्यवाहः (अग्निः)

हव्यवाह७ स्विष्टं ॥

Below is the full text of the concised Mantra given in “italics” above. See notes above

हव्यवाहमभि-मातिषाहं॥ । रक्षोहणं पृतनासु जिष्णुं ।
 ज्योतिष्मन्तं दीद्यतं पुरन्धिं । अग्नि७ स्विष्ट कृतमा हुवेम ।
 स्विष्ट मग्ने अभितत् पृणाहि । विश्वा देव पृतना अभिष्य ।
 उरुन्नः पन्थां प्रदिशन् विभाहि ।
 ज्योतिष्मद्धेह्य जरन्न आयुः ॥ 112/28

This Expansion is appearing in TB 2.4.1.4

1.37 नक्षत्र उपहोम मन्त्राः

T.B.3.1.4.1 to T.B.3.1.5.15 for full item No.1.37

1. कृत्तिका

अ॒ग्नये॑ स्वा॒हा कृ॑त्ति॒काभ्य॑ स्स्वा॒हा ॥
 अ॒बा॒न्यै॑ स्वा॒हा दु॒लायै॑ स्वा॒हा ॥
 नि॒तल्यै॑ स्वा॒हा ऽभ्र॑यन्त्यै स्वा॒हा ॥
 मे॒घय॑न्त्यै स्वा॒हा व॒र्ष॑यन्त्यै स्वा॒हा ॥
 चु॒पु॒णीका॑यै स्वा॒हा ॥

2. रोहिणी

प्र॒जाप॑तये स्वा॒हा रो॒हि॒ण्यै॑ स्वा॒हा ॥
 रो॒च॒मा॒नायै॑ स्वा॒हा प्र॒जा॒भ्य॑ स्वा॒हा ॥

3. मृगशीर्षः

सो॒माय॑ स्वा॒हा मृ॒गशी॑र्षाय स्वा॒हा ॥
 इ॒न्व॒काभ्य॑ स्स्वा॒हौष॑धीभ्य स्स्वा॒हा ॥
 रा॒ज्याय॑ स्वा॒हा-ऽभि॑जित्यै स्वा॒हा ॥ 113

4. आर्द्रा

रु॒द्राय॑ स्वा॒हाऽऽर्द्रा॑यै॒ स्वाहा॑ ॥

पि॒न्व॒मा॒नायै॑ स्वा॒हा प॒शु॒भ्य॑ स्स्वा॒हा ॥

5. पुनर्वसु

अ॒दि॒त्यै॑ स्वा॒हा पु॒नर्व॑सु॒भ्यां॑ ।

स्वा॒हा भू॒त्यै॑ स्वा॒हा प्र॒जा॒त्यै॑ स्वा॒हा ॥

6. पुष्यः

बृ॒ह॒स्प॒तये॑ स्वा॒हा ति॒ष्या॑य स्वा॒हा । ब्र॒ह्म॒व॒र्च॒साय॑ स्वा॒हा ॥

7. आश्रेष

स॒र्पे॒भ्य॑ स्स्वा॒हा ऽऽश्रे॑षा॒भ्य॑ स्स्वा॒हा ।

द॒न्द॒शू॒के॒भ्य॑ स्स्वा॒हा ॥

8. मघा

पि॒त॒ृ॒भ्य॑ स्स्वा॒हा म॒घा॒भ्यः॑ ।

स्वा॒हा ऽन॒घा॒भ्य॑ स्स्वा॒हा ऽग॒दा॒भ्यः॑ ।

स्वा॒हा रु॒न्ध॒ती॒भ्य॑ स्स्वा॒हा ॥ 114

9. पूर्व फल्गुनी

अ॒र्य॒म्णे॒ स्वा॒हा॒ फ॒ल्गु॒नी॒भ्या॒ स्वा॒हा॑ ॥

प॒शु॒भ्य॒ स्स्वा॒हा॑ ॥

10. उत्तर फल्गुनी

भ॒गाय॒ स्वा॒हा॒ फ॒ल्गु॒नी॒भ्या॒ स्वा॒हा॑ ॥

श्रै॒ष्ठ्या॒य॒ स्वा॒हा॑ ॥

11. हस्तः

स॒वि॒त्रे॒ स्वा॒हा॒ ह॒स्ता॒य॒ ।

स्वा॒हा॒ द॒द॒ते॒ स्वा॒हा॒ पृ॒ण॒ते॒ ।

स्वा॒हा॒ प्र॒य॒च्छ॒ते॒ स्वा॒हा॒ प्र॒ति॒गृ॒भ्ण॒ते॒ स्वा॒हा॑ ॥

12. चित्रा

त्व॒ष्ट्रे॒ स्वा॒हा॒ चि॒त्रा॒यै॒ स्वा॒हा॑ ॥

चै॒त्रा॒य॒ स्वा॒हा॒ प्र॒जा॒यै॒ स्वा॒हा॑ ॥

13. स्वाति

वा॒य॒वे॒ स्वा॒हा॒ नि॒ष्ठ्या॒यै॒ स्वा॒हा॑ ॥

का॒म॒चा॒रा॒य॒ स्वा॒हा॒ ऽभि॒जि॒त्यै॒ स्वा॒हा॑ ॥

14. विशाखा

इन्द्रा॑ग्निभ्या॒ स्वाहा॑ विशा॑खाभ्या॒ स्वाहा॑ ॥
 श्रैष्ठा॑य स्वाहा॒ ऽभिजि॑त्यै स्वाहा॒ ॥

15. पौर्णमासि

पौर्ण॑मास्यै स्वाहा॒ कामा॑य स्वाहा॒ गत्यै॑ स्वाहा॒ ॥ 115 (29)

16. अनूराधा

मित्रा॑य स्वाहा॒-ऽनूरा॑धेभ्य स्स्वाहा॒ ॥
 मित्र॑धेयाय स्वाहा॒ ऽभिजि॑त्यै स्वाहा॒ ॥

17. ज्येष्ठा

इन्द्रा॑य स्वाहा॒ ज्येष्ठा॑यै स्वाहा॒ ॥
 ज्यैष्ठा॑य स्वाहा॒-ऽभिजि॑त्यै स्वाहा॒ ॥

18. मूलं

प्रजा॑पतये स्वाहा॒ मूला॑य स्वाहा॒ । प्रजा॑यै स्वाहा॒ ॥

19. पूर्वाषाढा

अद्भ्य॑ स्स्वाहा॒ ऽषाढा॑भ्य स्स्वाहा॒ ॥
 समु॑द्राय स्वाहा॒ कामा॑य स्वाहा॒ ॥

अ॒भिजि॒त्यै॑ स्वा॒हा ॥

20. उत्तराषाढा

वि॒श्वेभ्यो॑ दे॒वेभ्य॑ स्स्वा॒हा ऽषा॒ढाभ्य॑ स्स्वा॒हा ।

अ॒न॒प॒ज॒य्या॒य स्वा॒हा जि॒त्यै॑ स्वा॒हा ॥ 116

21. अभिजित्

ब्र॒ह्म॒णे स्वा॒हा ऽभि॒जि॒ते स्वा॒हा ।

ब्र॒ह्म॒लो॒काय॑ स्वा॒हा ऽभि॒जि॒त्यै॑ स्वा॒हा ॥

22. श्रवणं

वि॒ष्ण॒वे स्वा॒हा श्रो॒णायै॑ स्वा॒हा ।

इ॒लो॒काय॑ स्वा॒हा श्रु॒ताय॑ स्वा॒हा ॥

23. श्रविष्ठा

व॒सु॒भ्य स्स्वा॒हा श्र॒वि॒ष्ठाभ्य॑ स्स्वा॒हा ।

अ॒ग्राय॑ स्वा॒हा प॒री॒त्यै॑ स्वा॒हा ॥

24. शतभिषक्

व॒रु॒णाय॑ स्वा॒हा श॒त॒भि॒ष॒जे स्वा॒हा ।

भे॒ष॒जे॒भ्य स्स्वा॒हा ॥

25. पूर्व प्रोष्ठपदा

अजायै॑कपदे॑ स्वाहा॑ प्रोष्ठपदे॑भ्य स्स्वाहा॑ । 117

तेज॑से स्वाहा॑ ब्रह्म॑वर्चसाय॑ स्वाहा॑ ॥

26. उत्तर प्रोष्ठपदा

अह॑ये बु॒ध्निया॑य स्वाहा॑ प्रोष्ठपदे॑भ्य स्स्वाहा॑ ।

पति॑ष्ठायै॑ स्वाहा॑ ॥

27. रेवति

पू॒ष्णे स्वाहा॑ रेव॑त्यै स्वाहा॑ ।

प॒शुभ्य॑ स्स्वाहा॑ ॥

28. अश्विनी

अश्वि॑भ्याऽ स्वाहा॑ ऽश्वयु॑ग्भ्याऽ स्वाहा॑ ।

श्रो॒त्राय॑ स्वाहा॑ श्रु॒त्यै स्वाहा॑ ॥

29. अपभरणि

यमा॑य स्वाहा॑ ऽप॒भर॑णीभ्य स्स्वाहा॑ ।

राज्या॑य स्वाहा॑ ऽभि॒जित्यै॑ स्वाहा॑ ॥

30. अमावासि

अम॑वास्यायै॑ स्वाहा॑ कामा॑य स्वाहा॑ ऽऽग॑त्यै स्वाहा॑ ॥ 118 (30)

31. चन्द्रमा

चन्द्रम॑से स्वाहा॑ प्र॒तीदृ॑श्यायै स्वाहा॑ ।
 अ॒हो॒रा॒त्रेभ्य॑ स्स्वाहा॑-ऽर्द्धमा॑सेभ्य॑ स्स्वाहा॑ ।
 मा॑सेभ्य॑ स्स्वाह॑र्तुभ्य॑ स्स्वाहा॑ । सँ॒व॒त्स॒राय॑ स्वाहा॑ ॥

32. अहो रात्री

अ॒हे स्वाहा॑ रा॒त्रियै॑ स्वाहा॑ ।
 अ॒ति॒मु॒क्त्यै॑ स्वाहा॑ ॥

33. उषा

उ॒षसे॑ स्वाहा॑ व्यु॒ष्ट्यै॑ स्वाहा॑ ।
 व्यू॒षुष्यै॑ स्वाहा॑ व्यु॒च्छन्त्यै॑ स्वाहा॑ ।
 व्यु॒ष्टायै॑ स्वाहा॑ ॥

34. नक्षत्रः

नक्ष॑त्राय स्वाहा॑ दे॒ष्यते॑ स्वाहा॑ । 119
 उ॒द्यते॑ स्वाहा॑-दि॒ताय॑ स्वाहा॑ ।
 ह॒रसे॑ स्वाहा॑ भ॒रसे॑ स्वाहा॑ ।
 भ्रा॒जसे॑ स्वाहा॑ ते॒जसे॑ स्वाहा॑ ।
 तप॑से स्वाहा॑ ब्र॒ह्मव॑र्चसाय॑ स्वाहा॑ ॥

35. सूर्यः

सूर्या॑य स्वा॒हा नक्ष॑त्रेभ्य॒ स्स्वाहा॑ ॥

प्रति॒ष्ठायै॑ स्वा॒हा ॥

36. अदितिः

अदि॑त्यै स्वा॒हा प्रति॒ष्ठायै॑ स्वा॒हा ॥

37. विष्णुः

विष्ण॑वे स्वा॒हा यज्ञा॑य स्वा॒हा । प्रति॒ष्ठायै॑ स्वा॒हा ॥ 120

दधिक्राव॑णो अकारि॑षं

TS 7.4.19.4 for para 121

दधि॑क्राव॒णो अकारि॑षं जि॒ष्णो रश्च॑स्य वा॒जिनः॑ ।

सुर॑भि नो मु॒खा क॒रत् प्र॒ण आयू॑ष्णि ता॒रिषत्॑ ।

आपो॑हि॒ष्ठा मयो॑भुवस्ता न ऊ॒र्जे दधा॑तन । महे र॒णाय॑ चक्ष॒से ।

यो व॒श्नि॒वत॑मो रसस्तस्य॑ भाजयते ह नः ।

उ॒शती॑रिव मा॒तरः । तस्मा॑ अरङ्ग॒माम वो॑ यस्य क्षया॑य जिन्व॒थ ।

आपो॑ जनय॒था च नः॑ ॥ 121 (32)

1.38 वरुण सूक्तं

(TS 1.5.11.3)

उदु॒त्त॒मं॑ वरु॒ण पा॒श॒म॒स्म-द॒वा॒ध॒मं॑ वि॒म॒ध्य॒म॑ श्र॒थाय॑ ।
अ॒था व॒य॒मा॒दि॒त्य व्र॒ते त॒वा॒ना॒ग॒सो अ॒दि॒त॒ये स्या॒म ॥

(TS 1.2.8.1)

अ॒स्त॒भ्ना॒द्द॒ध्या-मृ॒ष॒भो अ॒न्त॒रि॒क्ष-म॒मि॒मी॒त-व॒रि॒मा॒णं पृ॒थि॒व्या
आ॒ऽसी॒द॒द्वि॒श्वा भु॒व॒ना॒नि स॒म्रा॒ड् वि॒श्वे॒त्ता॒नि वरु॒णस्य॑ व्र॒ता॒नि ॥

(TS 3.4.11.6)

य॒त्किञ्चे॒दँ वरु॒ण दै॒व्ये ज॒ने॒ऽभि॒द्रो॒हं म॒नु॒ष्या-श्र॒रा॒म॒सि ।
अ॒चि॒त्ती-य॒त्त॒व-ध॒र्मा यु॒यो॒पि॒म-मा॒न॒स्त॒स्मा दे॒न॒सो दे॒व री॒रि॒षः ॥

(TS 3.4.11.6)

कि॒त॒वा॒सो य॒द्रि॒रि॒पु॒र्न दी॒वि य॒द्वा घा स॒त्य-मु॒त॒य॒न्न वि॒द्म ।
स॒र्वा॒ता॒वि॒ष्य शि॒थि॒रे॒व दे॒वा॒था॒ते-स्या॒म वरु॒ण प्रि॒या॒सः ॥

(TS 1.5.11.3)

अ॒व॒ते॒हे॒डो वरु॒ण न॒मो॒भि॒र॒व य॒ज्ञे-भि॒री॒म॒हे ह॒वि॒र्भिः॑ ।
क्ष॒य॒न्न स्म॒भ्य म॒सुर-प्र॒चे॒तो रा॒ज॒न्ने॒ना॒ऽसि शि॒श्र॒थः कृ॒ता॒नि ॥

(T.S. 2.1.11.6)

त॒त्वा॒या॒मि ब्र॒ह्म॒णा व॒न्द॒मा॒न स्त॒दा॒शा॒स्ते य॒ज॒मा॒नो ह॒वि॒र्भिः॑ ।
अ॒हे॒ड॒मा॒नो वरु॒णे॒ह बो॒द्ध्यु॒रु॒श॒ऽस मा॒न आ॒युः प्र॒मो॒षीः॑ ॥ 122 (33)

1.39 पवमान सूक्तं

TS 5.6.1.1

हिरण्यवर्णाः शुचयः पावका यासुजातः कश्यपो यास्विन्द्रः ।
 अग्निँया गर्भँदधिरे विरूपास्ता न आपश्श७ स्योना भवन्तु ॥
 यासाँ राजा वरुणो याति मध्ये सत्यानृते अवपश्यन् जनानां ।
 मधुश्चुत-श्शुचयोयाः पावकास्ता न आपश्श७ स्योना भवन्तु ॥
 यासां देवादिवि कृण्वन्ति भक्षँया अन्तरिक्षे बहुधा भवन्ति ।
 याः पृथिवीं पयसोन्दन्ति शुक्रास्ता न आपश्श७ स्योना भवन्तु ॥
 शिवेन मा चक्षुषा पश्यताप शिशवया तनुवो-पस्पृशत त्वचमै ।
 सर्वाँ अग्नीँ रफ्सुषदो हुवे वो मयि वर्चो
 बलमोजो निधत्त ॥ 123 (34)

TB 1.4.8.1 (for item No. 124 to 129)

पवमान-स्सुवर्जनः । पवित्रेण विचर्षणिः । यः पोता स पुनातु मा ।
 पुनन्तु मा देवजनाः । पुनन्तु मन वोधिया । पुनन्तु विश्व आयवः ।
 जातवेदः पवित्रवत् । पवित्रेण पुनाहि मा । शुक्रेण देव दीद्यत् ।
 अग्ने क्रत्वा-क्रतूँ रनु ॥ 124

य॒त्ते॒ प॒वि॒त्र-म॒र्चि॒षि । अ॒ग्ने॒ वि॒त॒त-म॒न्त॒रा । ब्र॒ह्म॒ ते॒न पु॒नी॒म॒हे ।
 उ॒भा॒भ्यां॑ दे॒व स॒वि॒तः । प॒वि॒त्रे॒ण स॒वे॒न च॑ । इ॒दं ब्र॒ह्म पु॒नी॒म॒हे ।
 वै॒श्व॒दे॒वी पु॒न॒ती दे॒व्या॒गात् । य॒स्यै॒ ब॒ह्वी-स्त॒नु॒वो॒ वी॒त॒पृ॒ष्ठाः ।
 त॒या म॒द॒न्त-स्स॒ध॒माद्यै॑षु । व॒य॒ꣳ स्या॒म प॒त॒यो॒र॒यी॒णां ॥ 125

वै॒श्व॒ान॒रो र॒श्मि॒भि॒र्मा पु॒ना॒तु । वा॒तः प्रा॒णे॒न॑ षि॒रो म॒यो भूः ।
 द्या॒वापृ॑थि॒वी प॒य॒सा प॒यो॒भिः । ऋ॒ता॒व॒री य॒ज्ञि॒ये मा पु॒नी॒तां ।
 बृ॒ह॒द्भि-स्स॒वि त॒स्तृ॒भिः । व॒र्षि॒ष्ठैर्-दे॒व॒म॒न्म॒भिः ।
 अ॒ग्ने दक्षैः॑ पु॒ना॒हि॒मा । ये॒न दे॒वा अ॒पु॒न॒त ।
 ये ना॒पो दि॒व्य॒ङ्क॒शः । ते॒न दि॒व्ये॒न ब्र॒ह्म॒णा ॥ 126

इ॒दं ब्र॒ह्म पु॒नी॒म॒हे । यः पा॒व॒मा॒नी-र॒द्ध॒ये॒ति ।
 ऋ॒षि॒भि-स्सं॑भृ॒तꣳ र॒सं । स॒र्वꣳ स पू॒त॒म॒श्ना॒ति ।
 स्व॒दि॒तं मा॒त॒रि॒श्व॒ना । पा॒व॒मा॒नी॒र्यो अ॒द्ध॒ये॒ति ।
 ऋ॒षि॒भि-स्सं॑भृ॒तꣳ र॒सं । त॒स्मै सर॑स्व॒ती दु॒हे ।
 क्षी॒रꣳ सर्पि॑ र्म॒धू॒द॒कं । पा॒व॒मा॒नी-स्स्व॒स्त्य॒य॒नीः ॥ 127

सु॒दु॒घा॒हि प॒य॒स्व॒तीः । ऋ॒षि॒भि-स्सं॑भृ॒तो र॒सः ।
 ब्रा॒ह्म॒णेष्व॑-मृ॒तꣳ हि॒तं । पा॒व॒मा॒नीर् दि॒श॒न्तु॒ नः ।

इ॒मं लो॒कम॒थो अ॒मुं । का॒मा॒न्त्-स॒म॒र्ध॒न्तु नः ।
 दे॒वीर्दे॒वैः स॒मा भृ॒ताः । पा॒व॒मा॒नी-स्स्व॒स्त्य॒य॒नीः ।
 सु॒दु॒घा॒हि घृ॒तश्चु॒तः । ऋ॒षि॒भि-स्सं॒भृ॒तो र॒सः ॥ 128

ब्रा॒ह्म॒णेष्व॒-मृ॒तं हितं । येन॑ दे॒वाः प॒वि॒त्रेण॑ । आ॒त्मा॒नं पु॒न॒ते सदा॑ ॥
 तेन॑ स॒हस्र॑ धा॒रेण॑ । पा॒व॒मा॒न्यः पु॒न॒न्तु मा । प्रा॒जा॒प॒त्यं प॒वि॒त्रं ॥
 श॒तो॒द्यामं॑ हिर॒ण्म॒यं । तेन॑ ब्र॒ह्म वि॒दो व॒यं ।
 पू॒तं ब्र॒ह्म पु॒नी॒महे॑ । इन्द्र॑-स्सु॒नी॒ती स॒ह मा पु॒ना॒तु ।
 सोम॑-स्स्व॒स्त्या व॒रु॒ण-स्स॒मी॒च्या । य॒मो रा॒जा प्र॒मृ॒णाभिः॑ पु॒ना॒तु॒मा ।
 जा॒त॒वे॒दा मो॒र्ज॒य॒न्त्या पु॒ना॒तु । ओं भूर्भु॒वस्सु॒वः ॥ 129

TB 3.5.11.1

तच्छँ॑यो॒रा वृ॒णी॒महे॑ । गा॒तुं य॒ज्ञाय॑ । गा॒तु य॒ज्ञप॑तये ।
 दै॒वीस्व॒स्ति-र॒स्तु॒नः । स्व॒स्तिर्-मा॒नु॒षेभ्यः॑ ।
 ऊ॒र्ध्वं जि॒गा॒तु भे॒ष॒जं । श॒न्नो अ॒स्तु द्वि॒पदे॑ । शं॒च॒तु॒ष्पदे॑ ॥ 130 (36)
 ओं शा॒न्तिः शा॒न्तिः शा॒न्तिः ॥

(उदकशान्ति समाप्तं)

1.40 नक्षत्र सूक्तं (नक्षत्र जप मन्त्राः)

1. नक्षत्रं – कृत्तिका

अ॒ग्नि॒र्नः॑ पा॒तु कृ॒त्ति॒काः॑ । नक्ष॑त्रं दे॒वमिन्द्रि॑यं । इ॒दमा॑सां-वि॒चक्ष॑णं ।

ह॒वि॒रा॒सन् जु॑होत॒न । यस्य॑ भा॒न्ति रश्मि॑यो यस्य॑ के॒तवः॑ ।

यस्ये॒मा वि॒श्वा भु॑वनानि सर्वा॑ । स कृ॒त्ति॒का भि॒रभि॑-स॒म्व॑सानः ।

अ॒ग्नि॒र्नो दे॒वस्सु॑विते दधातु ॥

अ॒ग्नये॑ स्वा॒हा कृ॒त्ति॒काभ्य॑ स्वा॒हा ॥

अ॒बा॒यै स्वा॒हा दु॒लायै॑ स्वा॒हा ॥

नि॒तल्यै॑ स्वा॒हा ऽभ्र॑यन्त्यै स्वा॒हा ॥

मे॒घय॑न्त्यै स्वा॒हा व॒र्ष॑यन्त्यै स्वा॒हा ॥

चु॒पु॒णी॒कायै॑ स्वा॒हा ॥ 1

(कृत्तिका नक्षत्र देवतायै अग्नये नमः)

2. नक्षत्रं – रोहिणी

प्र॒जाप॑ते रोहि॒णी वे॑तु पत्नी॑ । वि॒श्वरू॑पा बृ॒हती॑ चि॒त्रभा॑नुः ।

सा नो॑ य॒ज्ञस्य॑ सु॒विते॑ दधातु । यथा॑ जी॒वेम॑ श॒रद॑स्स॒वीराः॑ ।

रोहि॒णी दे॒व्युद॑गात् पु॒रस्ता॑त् । वि॒श्वा रू॒पाणि॑ प्र॒तिमो॑द॒माना॑ ।

प्र॒जाप॑तिꣳ ह॒विषा॑ वर्धयन्ती । प्रि॒या दे॒वाना॑-मु॒पया॑तु य॒ज्ञं ॥

प्र॒जाप॑तये॒ स्वाहा॑ रोहि॒ण्यै॒ स्वाहा॑ ।

रोच॑मानायै॒ स्वाहा॑ प्र॒जाभ्य॑ स्वाहा॑ ॥ 2

(रोहिणी नक्षत्र देवतायै प्रजापतये नमः)

3. नक्षत्रं – मृगशीर्षः

सोमो॑ राजा॒ मृग॑शीर्षेण॒ आगन् । शिवं॑ नक्ष॒त्रं प्रि॑यमस्य॒ धाम॑ ।

आप्या॑यमानो बहु॒धा जने॑षु । रेतः॑ प्रजां॒ यज॑माने॒ दधातु॑ ।

यत्ते॑ नक्ष॒त्रं मृ॑गशीर्षमस्ति । प्रि॒यं राज॑न् प्रि॒यत॑मं प्रि॒याणां॑ ।

तस्मै॑ ते सोम॒ हवि॑षा विधेम । शन्न॑ एधि॒ द्विप॑दे शंचतु॒ष्पदे॑ ॥

सोमा॑य स्वाहा॒ मृग॑शीर्षाय॒ स्वाहा॑ ।

इ॒न्वका॑भ्य॒ स्स्वाहा॑षधीभ्य॒ स्स्वाहा॑ ।

राज्या॑य स्वाहा-ऽभिजि॒त्यै स्वाहा॑ ॥ 3

(मृगशीर्ष नक्षत्र देवतायै सोमाय नमः)

4. नक्षत्रं – आर्द्रा

आ॒र्द्रया॑ रु॒द्रः प्र॑थमा न एति । श्रेष्ठो॑ दे॒वानां॑ पतिर॒घ्नियानां॑ ।

नक्ष॑त्रमस्य॒ हवि॑षा विधेम । मा नः॑ प्र॒जां री॑रिषन् मोत॒ वी॒रान् ।

हेती॑ रु॒द्रस्य॑ परि॒णो वृ॑णक्तु । आ॒र्द्रा नक्ष॑त्रं जुषतां॒ हवि॑र्नः ।

प्र॒मुञ्च॑मानौ दु॒रितानि॑ वि॒श्वा । अ॒पाघ॑शं सन्तु-द॒ताम॑रातिं ॥

रु॒द्राय॑ स्वा॒हाऽऽर्द्रा॑यै स्वा॒हा ।

पि॒न्वमा॑नायै स्वा॒हा प॒शुभ्य॑ स्स्वा॒हा ॥ 4

(आर्द्रा नक्षत्र देवतायै रुद्राय नमः)

5.नक्षत्रं – पुनर्वसु

पु॒न॒र्नो॑ दे॒व्यदि॑तिः स्पृ॒णोतु॑ । पु॒न॒र्वसू॑ नः पु॒न॒रेतां॑ य॒ज्ञं ।

पु॒न॒र्नो॑ दे॒वा अ॒भिय॑न्तु सर्वे॑ । पु॒नः॑ पु॒न॒र्वो ह॒विषा॑ य॒जामः॑ ।

ए॒वा न॑ दे॒व्यदि॑तिरन॒र्वा । वि॒श्वस्य॑ भ॒र्त्री ज॒गतः॑ प्र॒तिष्ठा॑ ।

पु॒न॒र्वसू॑ ह॒विषा॑ व॒र्धय॑न्ती । प्रि॒यं दे॒वाना॑-म॒प्येतु॑ पा॒थः ॥

अ॒दि॒त्यै स्वा॒हा पु॒न॒र्वसु॑भ्यां ।

स्वा॒हा भू॒त्यै स्वा॒हा प्र॒जात्यै॑ स्वा॒हा ॥ 5

(पुनर्वसु नक्षत्र देवतायै अदित्यै नमः)

6.नक्षत्रं – पुष्यः

बृ॒हस्प॑तिः प्र॒थम॑ञ्जायमानः । ति॒ष्यं न॑क्ष॒त्रम॒भि सं॑ब॒भूव॑ ।

श्रे॒ष्ठो दे॒वानां॑ पृ॒तना॑सु जि॒ष्णुः । दि॒शो नु॑ सर्वा॑ अ॒भय॑न्नो अस्तु ।

ति॒ष्यः पु॒रस्ता॑दु॒त म॑ध्यतो नः । बृ॒हस्प॑तिर् नः प॒रिपा॑तु प॒श्चात् ।

बा॒धे ता॑न् द्वे॒ष्टो अ॒भयं॑ कृ॒णुतां॑ । सु॒वीर्य॑स्य प॒तय॑स्याम ॥

बृ॒ह॒स्प॒तये॑ स्वा॒हा ति॒ष्या॒य स्वा॒हा ।

ब्र॒ह्म॒व॒र्च॒साय॑ स्वा॒हा ॥ 6

(पुष्य नक्षत्र देवतायै बृहस्पतये नमः)

7. नक्षत्रं – आश्रेषं

इ॒दं॑ स॒र्पे॒भ्यो॑ ह॒वि॒र॒स्तु॑ जु॒ष्टं॑ । आ॒श्रे॒षा ये॒षा म॒नु॒य॒न्ति॑ चे॒तः॑ ।
ये अ॒न्त॒रि॒क्षं पृ॒थि॒वीं-क्षि॑यन्ति । ते॒न स्स॒र्पा॒सो ह॒व॒मा॒ग॒मि॒ष्ठाः॑ ।
ये रो॒च॒ने सूर्य॑स्यापि सर्पाः । ये दि॒वं दे॒वी-म॒नु॒स॒ञ्च॑रन्ति ।
येषा॒मा॒श्रे॒षा अ॒नु॒य॒न्ति॑ का॒मं॑ । ते॒भ्य-स्स॒र्पे॒भ्यो म॒धु-म॒ज्जु॑होमि ॥

स॒र्पे॒भ्य स्स्वा॒हा ॥ आ॒श्रे॒षा॒भ्य स्स्वा॒हा ॥

द॒न्द॒शू॒के॒भ्य स्स्वा॒हा ॥ 7

(आश्रेषा नक्षत्र देवतायै सर्पेभ्यो नमः)

8. नक्षत्रं – मघा

उ॒प॒हू॒ताः पि॒त॒रो ये॑ म॒घा॒सु॑ । म॒नो॑ज॒व॒स-स्सु॒कृत॑-स्सु॒कृ॒त्याः॑ ।
ते नो॑ नक्ष॒त्रे ह॒व॒मा॒ग॒मि॒ष्ठाः॑ । स्व॒धाभि॑र् य॒ज्ञं प्र॑य॒तं जु॑षन्तां ।
ये अ॒ग्नि॒दग्धा॑ येऽन॒ग्नि-दग्धाः॑ । येऽमुँ॒ल्लो॒कं पि॒त॒रः क्षि॑यन्ति ।
या॒श्च वि॒द्वया॑ उ॒ च न॑ प्र॒वि॒द्व । म॒घा॒सु॑ य॒ज्ञं सु॒कृतं॑ जुषन्तां ॥
पि॒तृ॒भ्य स्स्वा॒हा म॒घा॒भ्यः॑ ।

स्वाहा ऽनघाभ्य स्स्वाहा ऽगदाभ्यः ।

स्वाहारुन्धतीभ्य स्स्वाहा ॥ 8

(मघा नक्षत्र देवतायै पितृभ्यो नमः)

9.नक्षत्रं – पूर्वफल्गुनी

गवां पतिः फल्गुनी-नामसि त्वं । तदर्यमन् वरुण मित्र चारु ।
तंत्वा वयं सनितारं सनीनां । जीवा जीवन्तमुप सम्विशेम ।
येनेमा विश्वा भुवनानि सज्जिता । यस्य देवा अनुसंय्यन्ति चेतः ।
अर्यमा राजाऽजरस्तु विष्मान् । फल्गुनीना-मृषभो रोरवीति ॥
अर्यम्णे स्वाहा फल्गुनीभ्यां स्वाहा ।

पशुभ्य स्स्वाहा ॥ 9

(पूर्वफल्गुनी नक्षत्र देवतायै अर्यम्णे नमः)

10.नक्षत्रं – उत्तर फल्गुनी

श्रेष्ठो देवानां भगवो भगासि । तत्त्वा विदुः फल्गुनी-स्तस्य वित्तात् ।
अस्मभ्यं-क्षत्रमजरं सुवीर्यं । गोमदश्च-वदुपसन्नु-देह ।
भगोह दाता भग इत्प्रदाता । भगो देवीः फल्गुनी-राविवेश ।
भगस्येत्तं प्रसवं गमेम । यत्र देवै-स्सधमादं मदेम । ॥
भगाय स्वाहा फल्गुनीभ्यां स्वाहा ।

श्रैष्ठयाय स्वाहा ॥ 10

(उत्तरफल्गुनी नक्षत्र देवतायै भगाय नमः)

11. नक्षत्रं – हस्तः

आया॑तु दे॒व-स्स॑वि॒तो प॑यातु । हि॒रण्य॑ये॒न सु॑वृ॒ता र॑थे॒न ।
व॒हन॒ ह॒स्तः सु॑भ॒गं वि॑द्व॒नाप॑सं । प्र॒यच्छ॑न्तं प॒पु॒रिं पु॑ण्यम॒च्छ ।
ह॒स्तः प्र॒यच्छ॑ त्वमृ॒तं व॑सी॒यः । दक्षि॑णे॒न प्र॑तिगृ॒ष्णीम॑ ए॒नत् ।
दा॒ता॒र-म॒द्य स॑वि॒ता वि॑दे॒य । यो नो॑ ह॒स्ताय॑ प्र॒सु॒वाति॑ य॒ज्ञं ॥

स॒वि॒त्रे स्वा॑हा ह॒स्ताय॑ । स्वा॑हा द॒दते॑ स्वा॑हा पृ॒णते॑ ।
स्वा॑हा प्र॒यच्छ॑ते स्वा॑हा प्र॒तिगृ॑ष्णते स्वा॑हा ॥

(हस्त नक्षत्र देवतायै सवित्रे नमः) 11

12. नक्षत्रं – चित्रा

त्व॒ष्टा नक्ष॑त्र-म॒भ्येति॑ चि॒त्रां । सु॑भ॒ग् स॑सं-यु॒वति॑ रोच॑मानां ।
नि॒वेश॑यन्न-मृ॒तान् म॒र्त्याश्च॑ । रू॒पाणि॑ पि॒शन् भु॑वनानि वि॒श्वा ।
तन्न॑स्त्व॒ष्टा तदु॑ चि॒त्रा वि॑च॒ष्टां । तन्नक्ष॑त्रं भू॒रिदा॑ अ॒स्तु म॒ह्यं ।
तन्नः॑ प्र॒जां वी॑र॒वती॑ स॒नोतु॑ । गो॒भिर्नो॑ अ॒श्वै-स्स॑म॒नक्तु॑ य॒ज्ञं ॥

त्व॒ष्ट्रे स्वा॑हा चि॒त्रायै॑ स्वा॑हा ।

चै॒त्राय॑ स्वा॑हा प्र॒जायै॑ स्वा॑हा ॥ 12

(चित्रा नक्षत्र देवतायै त्वष्ट्रे नमः)

13.नक्षत्रं – स्वाती

वा॒युर् नक्ष॑त्र-म॒भ्येति॑ नि॒ष्ट्यां॑ । ति॒ग्मशृ॑ङ्गो वृष॒भो रो॑रुवाणः ।
 समी॑रयन् भुव॒ना मा॑तरिश्वा । अप॒ द्वेषा॑ऽसि नुद॒ताम॑रातीः ।
 तन्नो॑ वा॒यस्तदु॑ नि॒ष्ट्या श्रृ॑णोतु । तन्नक्ष॑त्रं भूरि॒दा अस्तु॑ मह्यं ।
 तन्नो॑ दे॒वासो अनु॑ जानन्तु॒ कामं॑ । यथा॑ तरे॒म दुरि॑तानि वि॒श्वा ॥
 वा॒यवे॑ स्वाहा नि॒ष्ट्यायै॑ स्वाहा ।
 का॒मचा॑राय स्वाहा ऽभिजि॒त्यै स्वाहा॑ ॥ 13

(स्वाती नक्षत्र देवतायै वायवे नमः)

14.नक्षत्रं – विशाखा

दूर-म॒स्मच्छ॑त्रवो यन्तु॒ भीताः॑ । तदिन्द्रा॑ग्नी कृ॒णुतां॑ तद् वि॒शाखे॑ ।
 तन्नो॑ दे॒वा अनु॑मदन्तु॒ यज्ञं॑ । पश्चात् पुरस्ता-द॒भय॑न्नो अस्तु ।
 नक्ष॑त्राणा-म॒धिप॑त्नी वि॒शाखे॑ । श्रेष्ठा-विन्द्रा॑ग्नी भुव॒नस्य॑ गो॒पौ ।
 विषू॑च-इ॒शत्रू॑नपबाध॒मानौ॑ । अप॒क्षुध-नु॑दताम॒रातिं॑ ॥
 इन्द्रा॑ग्निभ्यां स्वाहा वि॒शाखा॑भ्यां स्वाहा ।
 श्रैष्ठ्या॑य स्वाहा ऽभिजि॒त्यै स्वाहा॑ ॥ 14

(विशाखा नक्षत्र देवतायै इन्द्राग्निभ्यां नमः)

15. पौर्णमासि

पूर्णा पश्चादुत पूर्णा पुरस्तात् ॥ उन्मध्यतः पौर्णमासी जिगाय ।
 तस्यां देवा अधि सम्वसन्तः । उत्तमे नाक इह मादयन्तां ।
 पृथ्वी सुवर्चा युवति-स्सजोषाः । पौर्णमास्युदगा-च्छोभमाना ।
 आप्याय-यन्ती दुरितानि विश्वा । उरुं दुहां यँजमानाय यज्ञं ॥
 पौर्णमास्यै स्वाहा कामाय स्वाहा गत्यै स्वाहा ॥ 15
 (पौर्णमास्यै नमः)

16. नक्षत्रं - अनूराधा

ऋद्ध्यास्म हव्यैर् नमसोपसद्य । मित्रं देवं मित्रधेयन्नो अस्तु ।
 अनूराधान् हविषा वर्द्धयन्तः । शतं जीवेम शरदस्सवीराः ।
 चित्रं-नक्षत्र-मुदगात् पुरस्तात् । अनूराधास इति यद् वदन्ति ।
 तन्मित्र एति पथिभिर् देवयानैः । हिरण्ययैर् विततै-रन्तरिक्षे ॥
 मित्राय स्वाहा-ऽनूराधेभ्य स्स्वाहा ।
 मित्रधेयाय स्वाहाऽभिजित्यै स्वाहा ॥ 16
 (अनूराधा नक्षत्र देवतायै मित्राय नमः)

17. नक्षत्रं - ज्येष्ठा

इन्द्रो ज्येष्ठा मनु नक्षत्रमेति । यस्मिन् वृत्रं वृत्र तूर्ये ततार ।
 तस्मिन् वय-ममृतं दुहानाः । क्षुधन्तरेम दुरितिं दुरिष्टिं ।

पुर॒न्द॒राय॑ वृ॒षभा॑य धृ॒ष्णवे॑ । अ॒षाढा॑य स॒हमा॑नाय मी॒ढुषे॑ ।
 इन्द्रा॑य ज्ये॒ष्ठा मधु॑म॒द्बुहाना॑ । उरुं कृ॒णोतु॑ यज॒मानाय॑ लो॒कं ॥
 इन्द्रा॑य स्वाहा ज्ये॒ष्ठायै॑ स्वाहा ।
 ज्यैष्ठा॑य स्वाहा-ऽभिजि॒त्यै स्वाहा॑ ॥
 (ज्येष्ठा नक्षत्र देवतायै इन्द्राय नमः) 17

18. नक्षत्रं – मूलं

मूलं प्र॒जां वी॒रवतीं॑ वि॒देय॑ । परा॒च्येतु॑ निर्ऋ॒तिः परा॑चा ।
 गोभि॑र् नक्षत्रं पशु॒भि-स्सम॑क्तं । अ॒हर् भूयाद् यज॒मानाय॑ मह्यं॑ ।
 अ॒हर्नो॑ अ॒द्य सु॒विते॑ दधातु । मूलं नक्षत्रमि॒ति यद् वद॑न्ति ।
 परा॒चीं वा॒चा निर्ऋ॒तिं नु॒दामि॑ । शि॒वं प्र॒जायै॑ शि॒वमस्तु॑ मह्यं॑ ॥
 प्र॒जाप॑तये स्वाहा मू॒लाय॑ स्वाहा ।
 प्र॒जायै॑ स्वाहा ॥

(मूला नक्षत्र देवतायै प्रजापतये नमः) 18

19. नक्षत्रं – पूर्वाषाढा

या दि॒व्या आपः॑ पय॒सा सं॒बभू॑वुः । या अ॒न्तरि॑क्ष उ॒त पा॒र्त्थि॒वीर्याः॑ ।
 यासा॑म॒षाढा॑ अ॒नुय॑न्ति का॒मं । ता न आपः॑ श॒ऽस्यो॒ना भ॑वन्तु ।
 याश्च॑ कू॒प्या याश्च॑ ना॒द्या-स्समु॑द्रि॒याः । याश्च॑ वै॒शन्ती॑रु॒त प्रा॑स॒चीर्याः॑ ।
 यासा॑म॒षाढा॑ मधु॒ भक्ष॑यन्ति । ता न आपः॑ श॒ऽस्यो॒ना भ॑वन्तु ॥

अ॒द्भ्य॒ स्स्वा॒हा ऽषा॒ढाभ्य॒ स्स्वा॒हा ।

स॒मु॒द्राय॒ स्वा॒हा का॒माय॒ स्वा॒हा ।

अ॒भि॒जि॒त्यै स्वा॒हा ॥ 19

(पूर्वा॒षाढा॒ नक्ष॒त्र दे॒वता॒यै अ॒द्भ्यो नमः॑)

20. नक्षत्रं – उत्तराषाढा

तन्नो॑ वि॒श्वे उप॑ शृण्वन्तु दे॒वाः । तद॑षाढा अ॒भि स॒म्य॑न्तु य॒ज्ञं ।

तन्नक्ष॑त्रं प्रथ॒तां प॒शुभ्यः॑ । कृ॒षिर् वृ॒ष्टिर् य॒जमा॑नाय कल्प॒तां ।

शु॒भ्राः क॒न्या यु॒वत॑य-स्सुपे॒शसः॑ । क॒र्मकृ॑त-स्सु॒कृ॒तो वी॒र्या॑वतीः ।

वि॒श्वान् दे॒वान् ह॒विषा॑ वर्द्धयन्तीः ।

अ॒षाढाः का॒म मु॒पया॑न्तु य॒ज्ञं ॥

वि॒श्वेभ्यो॑ दे॒वेभ्य॒ स्स्वा॒हा ऽषा॒ढाभ्य॒ स्स्वा॒हा ।

अ॒न॒प॒ज॒य्याय॒ स्वा॒हा जि॒त्यै स्वा॒हा ॥ 20

(उत्तरा॒षाढा॒ नक्ष॒त्र दे॒वता॒यै वि॒श्वेभ्यो॑ दे॒वेभ्यो॑ नमः॑)

21. नक्षत्रं – अभिजिद

यस्मिन्॑ ब्र॒ह्माऽभ्य॑जय॒थ् सर्व॑मेतत् । अ॒मुञ्च॑ लो॒क मि॒दमू॑च॒ सर्वं॑ ।

तन्नो॑ नक्ष॒त्र-म॒भि॒जि॒द् वि॒जित्य॑ । श्रि॒यं द॒धात्व॑हणीय॒मानं॑ ।

उ॒भौ लो॒कौ ब्र॒ह्म॒णा स॒ज्जि॑तेमौ । तन्नो॑ नक्ष॒त्र-म॒भि॒जि॒द् वि॒चष्टां॑ ।

तस्मिन्॑ व॒यं पृ॒त॒ना स्सं॑जयेम । तन्नो॑ दे॒वासो॑ अ॒नु॒जा॒नन्तु॑ का॒मं ॥

ब्रह्म॑णे स्वाहा॑ ऽभिजि॑ते स्वाहा॑ ॥

ब्रह्म॑लोकाय स्वाहा॑ ऽभिजि॑त्यै स्वाहा॑ ॥ 21

(अभिजित् नक्षत्र देवतायै ब्रह्मणे नमः)

22.नक्षत्रं – श्रवणं

शृण्व॑न्ति श्रो॒णा-म॑मृतस्य गोपां । पु॒ण्याम॑स्या उप॑शृणोमि वाचं ॥

म॒हीं दे॒वीं वि॒ष्णुप॑त्नी म॒जूर्या॑ । प्र॒तीची॑ मेना॒ ह॒विषा॑ यजामः ।

त्रेधा॑ वि॒ष्णु-रु॒रुगा॑यो विच॒क्रमे॑ । म॒हीं दि॒वं पृ॒थि॒वी-म॑न्तरि॒क्षं ।

तच्छ्रो॑णैति श्रव॑-इच्छ॑माना ।

पु॒ण्यं॑ श्लो॒कं य॑ज॒मानाय॑ कृण्वती ॥

वि॒ष्णवे॑ स्वाहा॑ श्रो॒णायै॑ स्वाहा॑ ।

श्लो॒काय॑ स्वाहा॑ श्रु॒ताय॑ स्वाहा॑ ॥ 22

(श्रवण नक्षत्र देवतायै विष्णवे नमः)

23.नक्षत्रं – श्रविष्ठा

अष्टौ॑ दे॒वा वस॑वस्सोम्यासः । चत॑स्रो दे॒वी रज॑राः श्रवि॑ष्ठाः ।

ते य॒ज्ञं पा॑न्तु रज॑सः पर॒स्तात् । सम्॑व॒त्सरी॑ण-म॑मृतं स्व॒स्ति ।

य॒ज्ञं नः॑ पा॑न्तु वस॑वः पु॒रस्ता॑त् । दक्षि॑णतो-ऽभिय॑न्तु श्रवि॑ष्ठाः ।

पु॒ण्यन्न॑क्षत्रम॒भि सम्॑विशाम । मा नो॑ अ॒राति॑-रघ॑शं साग॑न् ॥

वसु॑भ्य॒ स्स्वाहा॑ श्रवि॑ष्ठाभ्य॒ स्स्वाहा॑ ।

अ॒ग्राय॑ स्वाहा॒ परी॑त्यै स्वाहा॑ ॥ 23

(श्रवि॑ष्ठा नक्ष॒त्र दे॒वता॑यै वसु॑भ्यो नमः)

24.नक्ष॒त्रं – श॒तभि॑षक्

क्ष॒त्रस्य॑ रा॒जा वरु॑णोऽधि॒राजः॑ । नक्ष॑त्राणां॒ श॒तभि॑षग् वसि॒ष्ठः ।

तौ दे॒वेभ्यः॑ कृ॒णुतो॑ दी॒र्घमा॑युः । श॒तं सह॑स्रा भेष॒जानि॑ ध॒त्तः ।

य॒ज्ञ॒न्नो रा॒जा वरु॑ण॒ उप॑यातु । त॒न्नो वि॒श्वे अ॒भिस॑म्यन्तु दे॒वाः ।

त॒न्नो नक्ष॑त्रं॒ श॒तभि॑षग् जुषा॒णं । दी॒र्घमा॑युः प्र॒तिर॑द् भेष॒जानि॑ ॥

वरु॑णाय॒ स्वाहा॑ श॒तभि॑षजे॒ स्वाहा॑ ।

भेष॑जेभ्य॒ स्स्वाहा॑ ॥ 24

(श॒तभि॑षक् नक्ष॒त्र दे॒वता॑यै वरु॑णाय नमः)

25.नक्ष॒त्रं – पू॒र्वप्रो॑ष्ठप॒दा

अ॒ज ए॒कपा॑-दु॒दगा॑त् पु॒रस्ता॑त् । वि॒श्वा भू॑तानि॒ प्रति॑ मोद॒मानः॑ ।

तस्य॑ दे॒वाः प्र॒सवं॑ य॒न्ति स॑र्वे । प्रो॒ष्ठप॑दासो अ॒मृत॑स्य गो॒पाः ।

वि॒भ्राज॑मान-स्स॒मिधा॑न उ॒ग्रः । आ॒न्तरि॑क्ष-म॒रुह॑द-ग॒न्धां ।

तं सूर्य॑ दे॒व-म॒जमे॑कपादं । प्रो॒ष्ठप॑दासो अ॒नुय॑न्ति स॑र्वे ॥

अ॒जायै॑कप॒दे स्वाहा॑ प्रो॒ष्ठप॑देभ्य॒ स्स्वाहा॑ ।

ते॒जसे॒ स्वाहा॑ ब्र॒ह्मव॑र्चसाय॒ स्वाहा॑ ॥ 25

(पूर्वप्रोष्ठपदा नक्षत्र देवतायै अजाय एकपदे नमः)

26.नक्षत्रं – उत्तरप्रोष्ठपदा

अहि॑ बु॒दि॒ध्नयः॑ प्रथ॑मान एति॑ । श्रेष्ठो॑ दे॒वाना॑मु॒त मा॑नु॒षाणां॑ ।
तं ब्रा॒ह्मणा॑-स्सो॒मपा॑-स्सो॒म्यासः॑ । प्रो॒ष्ठप॑दासो॒ अभि॑रक्षन्ति॒ सर्वे॑ ॥
चत्वार॑ एक॒मभि॑ कर्म॒ देवाः॑ । प्रो॒ष्ठप॑दास इति॒ यान् वद॑न्ति ।
ते बु॒द्धनियं॑ परि॒षद्य॑ स्तु॒वन्तः॑ । अहि॑ रक्षन्ति॒ नम॑सोप॒सद्य॑ ॥

अ॒हये॑ बु॒ध्निया॑य स्वाहा॑ प्रो॒ष्ठप॑देभ्य॒ स्व्वाहा॑ ॥

पति॑ष्ठायै॒ स्वाहा॑ ॥ 26

(उत्तरप्रोष्ठपदा नक्षत्र देवतायै अहये बुध्नियाय नमः)

27.नक्षत्रं – रेवती

पू॒षा रे॒वत्य॑न्वेति॒ पन्थां॑ ॥ पु॒ष्टि॒पती॑ प॒शुपा॑ वाज॒बस्त्यौ॑ ।
इ॒मानि॑ ह॒व्या प्र॑यता जुषाणा । सु॒गैर्नो॑ या॒नैरु॑पयातां य॒ज्ञं ।
क्षु॒द्रान् प॒शून् रक्ष॑तु रे॒वती॑ नः । गा॒वो नो॑ अश्वा॒न् अन्वे॑तु पू॒षा ।
अ॒न्नं रक्ष॑न्तौ बहु॒धा वि॑रूपं । वाज॑ स॒नुतां॑ य॒जमा॑नाय॒ यज्ञं॑ ॥
पू॒ष्णे स्वाहा॑ रे॒वत्यै॑ स्वाहा॑ ॥

प॒शुभ्य॑ स्व्वाहा॑ ॥ 27 (रेवती नक्षत्र देवतायै पूष्णे नमः)

28 नक्षत्रं – अश्विनी

तद॒श्विना॑-व॒श्वयु॑जोपयातां । शु॒भङ्ग॑मिष्टौ सु॒यमे॑भिरश्वैः ॥
 स्व॒न्नक्ष॑त्रं ह॒विषा॑ यजन्तौ । म॒ध्वा संपृ॑क्तौ यजु॒षा सम॑क्तौ ।
 यौ दे॒वानां॑ भिष॒जौ ह॒व्यवा॑हौ । वि॒श्वस्य॑ दू॒ता-व॑मृतस्य गो॒पौ ।
 तौ नक्ष॑त्रं-जुजुषा॒णो-प॑यातां । नमोऽश्वि॒भ्यां कृ॑णुमो-ऽश्वयु॒ग्भ्यां ॥
 अ॒श्विभ्या॑ स्वाहा ऽश्वयु॒ग्भ्या॑ स्वाहा ।
 श्रो॒त्राय॑ स्वाहा श्रु॒त्यै स्वाहा ॥ 28

(अश्विनी नक्षत्र देवतायै अश्विभ्यां नमः)

29. नक्षत्रं – अपभरणी

अप॑ पाप्मानं भ॒रणी॑र् भरन्तु । तद् य॒मो रा॒जा भ॑गवान्, वि॒चष्टां॑ ।
 लो॒कस्य॑ रा॒जा म॑हतो म॒हान्, हि॑ । सु॒गन्तः॑ पन्थामभयं कृ॒णोतु॑ ।
 यस्मिन्॑ नक्ष॒त्रे य॑म ए॒ति रा॒जा । यस्मिन्ने॑न-म॒भ्यर्षि॑चन्त दे॒वाः ।
 तद॒स्य चि॒त्रं ह॒विषा॑ यजाम । अप॑ पाप्मानं भ॒रणी॑र् भरन्तु ॥
 य॒माय॑ स्वाहा ऽप॒भर॑णीभ्य स्स्वाहा ।
 रा॒ज्याय॑ स्वाहा ऽभि॒जित्यै॑ स्वाहा ॥ 29

(अपभरणी नक्षत्र देवतायै यमाय नमः)

30. अमावासि

नि॒वेश॑नी॒ स॒ङ्ग॑मनी॒ वसू॑नां॒ वि॒श्वा॑ रू॒पाणि॑ वसू॒न्या-वे॑शय॒न्ती ।
 स॒हस्र॑पोष॒ः सु॒भगा॑ रराणा॒ सा न॑ आ॒गन् वर्च॑सा॒ सम् वि॑दाना ।
 यत्ते॒ दे॒वा अ॒दधु॑र् भा॒गधे॑य-ममा॒वास्ये॑ सम्॒वस॑न्तो म॒हित्वा ।
 सा नो॒ यज्ञं॑ पि॒पृहि॑ वि॒श्ववा॑रे रयि॒न्नो धे॒हि सु॒भगे॑ सु॒वीरं॑ ॥
 अ॒मवा॑स्यायै॒ स्वाहा॑ का॒माय॑ स्वाहा ऽऽग॒त्यै स्वाहा॑ ॥ 30
 (अमा॒वास्यै॒ नमः॑)

31. चन्द्रमा

नवो॑ नवो॑ भवति जा॒यमा॑नोऽ॒ह्नां के॒तु-रु॒षसा॑ मे॒त्यग्रे॑ ।
 भा॒गं दे॒वेभ्यो॑ वि॒दधा॑त्यायन् प्र॒चन्द्र॑मास्तिरि॒ति दी॒र्घमा॑युः ।
 यमा॑दित्या अ॒शुमा॑प्याययन्ति यम॒क्षित॑-म॒क्षित॑यः पिब॒न्ति ।
 तेन॑ नो॒ राजा॑ वरु॒णो बृ॒हस्प॑ति रा॒प्याय॑यन्तु॒ भुव॑नस्य गो॒पाः ॥
 च॒न्द्रम॑से॒ स्वाहा॑ प्र॒तीदृ॑श्यायै॒ स्वाहा॑ ।
 अ॒होरा॑त्रेभ्य॒ स्स्वाहा॑-ऽर्द्धमा॑सेभ्य॒ स्स्वाहा॑ ।
 मा॑सेभ्य॒ स्स्वाह॑र्तुभ्य॒ स्स्वाहा॑ । सं॒वँत्स॑राय॒ स्वाहा॑ ॥ 31
 (च॒न्द्रम॑से॒ नमः॑)

32. अहो रात्र

ये वि॒रूपे॑ सम॒नसा॑ सम्॒व्यय॑न्ती । सम॒नं तन्तुं॑ परि॒ता-तना॑ते ॥
 वि॒भू प्र॒भू अनु॒भू वि॒श्वतो॑ हुवे । ते नो नक्ष॑त्रे हव॒माग॑मेतं ।
 वयं दे॒वी ब्र॒ह्मणा॑ सम्॒विदा॑नाः । सुर॒त्नासो॑ दे॒ववी॑तिं द॒धानाः॑ ।
 अ॒होरा॒त्रे ह॒विषा॑ वर्द्धय॑न्तः । अति॑ पा॒प्मान॑-मति॒मुक्त्या॑ गमेम ॥
 अ॒हे स्वा॒हा रा॒त्रियै॑ स्वा॒हा ॥
 अति॑मु॒क्त्यै स्वा॒हा ॥ 32

(अहो रात्राभ्यां नमः)

33. उषा

प्रत्यु॑व दृ॒श्याय॑ती । व्यु॒च्छन्ती॑ दुहि॒ता दि॒वः ।
 अ॒पो म॒ही वृ॒णुते॑ चक्षु॒षा । तमो॑ ज्योति॒ष्-कृ॑णोति सू॒नरी॑ ॥
 उ॒दु स्त्रि॒यास्स॑चते सू॒र्यः । स चा॑ उ॒द्यन्नक्ष॑त्र म॒र्चिम॑त् ।
 तवे॑ दु॒षो व्यु॒षि सू॒र्यस्य॑ च । सं॒भक्ते॑न गमेमहि ॥
 उ॒षसे॑ स्वा॒हा व्यु॒ष्ट्यै॑ स्वा॒हा ॥
 व्यू॒षुष्यै॑ स्वा॒हा व्यु॒च्छन्त्यै॑ स्वा॒हा ॥
 व्यु॒ष्टायै॑ स्वा॒हा ॥ 33 (उषसे नमः)

34. नक्षत्रः

तन्नो नक्षत्र मर्चिमत् । भानुमत्तेज उच्छरत् ।
 उप यज्ञमिहागमत् । प्रनक्षत्राय देवाय । इन्द्रायेन्दु॑ हवामहे ।
 स न स्सविता सुवथ् सनिं । पुष्टिदां वीरवत्तमं ॥
 नक्षत्राय स्वाहो॑ देष्यते स्वाहा ॥ उद्यते स्वाहो-दिताय स्वाहा ॥
 हरसे स्वाहा भरसे स्वाहा ॥ भ्राजसे स्वाहा तेजसे स्वाहा ॥
 तपसे स्वाहा ब्रह्मवर्चसाय स्वाहा ॥ 34 (नक्षत्राय नमः)

35. सूर्यः

उदुत्यं जातवेदसं देवं वहन्ति केतवः । दृशे विश्वाय सूर्य ॥
 चित्रं देवाना मुदगादनीकं चक्षुर् मित्रस्य वरुणस्याग्नेः ।
 आऽप्रा द्यावापृथिवी अन्तरिक्ष सूर्य आत्मा जगतस्तस्थुषश्च ॥
 सूर्याय स्वाहा नक्षत्रेभ्य स्स्वाहा ॥
 प्रतिष्ठायै स्वाहा ॥ 35 (सूर्याय नमः)

36. अदितिः

अदितिर्न उरुष्य-त्वदितिः शर्म यच्छतु । अदितिः पात्व॑ हसः ।
 महीमूषु मातर॑ सुव्रताना-मृतस्य पत्नी मवसे हुवेम ।
 तुविक्षत्रा-मजरन्ती मरूची॑ सुशर्माण-मदिति॑ सुप्रणीतिं ॥

अ॒दि॒त्यै॑ स्वा॒हा प्र॒ति॒ष्ठा॒यै॑ स्वा॒हा ॥ 36 (अ॒दि॒त्यै॑ नमः)

37. वि॒ष्णुः

इ॒दं वि॒ष्णु॒र् वि॒च॒क्र॒मे त्रे॒धा नि॒द॒धे प॒दं । स॒मू॒ढ॒म॒स्य॑ पा॒ञ्च॒ सुरे॑ ।
 प्र॒त॒द्वि॒ष्णु॒ स्त॒व॒ते वी॒र्या॑य । मृ॒गो न॑ भी॒मः कु॒च॒रो गि॒रि॒ष्ठाः ।
 य॒स्यो॒रु॒षु त्रि॒षु वि॒क्र॒म॒णेषु॑ । अ॒धि॒क्षि॒यन्ति॑ भु॒व॒ना॒नि वि॒श्वा ॥
 वि॒ष्ण॒वे स्वा॒हा य॒ज्ञाय॑ स्वा॒हा ।

प्र॒ति॒ष्ठा॒यै॑ स्वा॒हा ॥ 37 (वि॒ष्ण॒वे नमः)

38. अ॒ग्निः

अ॒ग्नि॒र् मूर्धा॑ दि॒वः क॒कु॒त्प॒तिः पृ॒थि॒व्या अ॒यं ।
 अ॒पाञ्च॑ रे॒ताञ्च॑ सि जि॒न्वति॑ ।
 भु॒वो य॒ज्ञ॒स्य॑ र॒ज॒सश्च॑ ने॒ता य॒त्रा नि॒यु॒द्धिः स॒च॒से शि॒वा॒भिः ।
 दि॒वि मूर्धा॑नं दधि॒षे सु॒व॒र्षां जि॒ह्वा॒म॒ग्ने च॒कृ॒षे ह॒व्य॒वा॒हं ॥
 (अ॒ग्नये॑ नमः) 38

39. अ॒नु॒म॒ती

अ॒नु॒नोऽ॒द्या॒नु॒म॒ति॑ र्य॒ज्ञं दे॒वेषु॑ म॒न्य॒तां ।
 अ॒ग्निश्च॑ ह॒व्य॒वा॒ह॒नो भ॒व॒तां दा॒शु॒षे म॒यः ।
 अ॒न्वि॒द॒नु॒म॒ते त्वं म॒न्या॒सै शं॒च नः॑ कृ॒धि ।
 क्र॒त्वे द॒क्षाय॑ नो हि॒नु प्र॒ण आ॒यू॒षि॑ ता॒रि॒षः ॥

(अनुमत्यै नमः) 39

40. हव्यवाहः (अग्निः)

हव्यवा॑हम॒भि-मा॑ति॒षाहं॑ । र॒क्षो॑हणं॒ पृ॒तना॑सु जि॒ष्णुं॑ ।
 ज्यो॒तिष्म॑न्तं दी॒द्यतं॑ पु॒रन्धिं॑ । अ॒ग्नि॒ऽस्वि॑ष्ट कृ॒तमा॑ हु॒वेम॑ ।
 स्वि॑ष्ट म॒ग्ने अ॒भित॑त् पृ॒णाहि॑ । वि॒श्वा दे॒व पृ॒तना॑ अ॒भिष्य॑ ।
 उ॒रुन्नः॑ पन्थां॑ प्र॒दिशन्॑ वि॒भाहि॑ ।
 ज्यो॒तिष्म॑द्धे॒ह्य ज॒रन्न॑ आ॒युः॑ ॥ (अ॒ग्नये॑ नमः) 40

नक्षत्रदेवताभ्यो नमः

ओं शान्तिः॑ शान्तिः॑ शान्तिः॑